


明史彙編

傳

庫	文	閣	內
八	八	漢	
函	三	書	
三	七		
八	五		
架	冊	號	類

內閣文庫	
番號	漢 8835
冊數	78 (29)
函號	281 39



明史藁

列傳第一

光祿大夫

經筵講官明史總裁戶部尚書加七級

臣王鴻緒奉

敕編撰

后妃上

太祖孝慈高皇后

孫貴妃

李淑妃

郭寧妃

懿文太子常妃

呂妃


建文馬皇后

成祖仁孝徐皇后

權賢妃

王貴妃

仁宗誠孝張皇后



宣宗恭讓胡皇后

孝恭孫皇后

吳賢妃

郭嬪

英宗孝莊錢皇后

孝肅周太后

景帝汪廢后

肅孝杭皇后附

憲宗吳廢后

孝貞王皇后

孝穆紀太后

孝惠邵太后

萬貴妃

明太祖鑒前代女禍立綱陳紀首嚴壺教洪武元年命儒臣修女誠諭翰林學士朱升曰治天下者修身為本正家為先后妃雖母儀天下然不可俾預政事至於嬪嬙之屬奉侍中節恩寵或過踰禮越防上下失序歷代宮闈政由內出

不為禍亂者夫內嬖惑人甚於鳩毒惟明主能察於未然下此多為所累卿等其纂述女誠及古賢妃事可為法者使後世子孫知所持守升等乃編錄上之五年六月命禮臣議宮官女職之制禮臣上言周制後宮設內官以贊內治漢設內官一十四等凡數百人唐設六局二十四司官凡一百九十人女使五十餘人皆選良家女充之帝曰所設過多宜防寵嬖命重加裁定於是折衷曩制女官立六局一司局曰尚宮尚儀尚服尚食尚寢尚功司曰宮正秩皆正六品每局領四司其屬二十有四而尚宮司總行六局之事戒令責罰則宮正掌之官七十五人女史十八人視唐減百四十餘人凡以服勞宮寢祇勤典守而已一切充華美人昭容修媛雖著稱

前錄而意在色升名垂德選者悉罷不設諸妃位號亦惟取賢淑莊敬惠順康寧閨房雍肅旨寓深遠又命工部制紅牌鐫戒諭后妃之詞懸於宮中牌用鐵字飾以金復著令典自后妃以下至嬪御女史巨細衣食之費金銀幣帛器用百物之供皆自尚宮取旨牒內使監覆奏移部臣取給焉若尚宮不及奏內使監不覆奏而輒領於部者論死或以私書出外罪亦如之宮嬪以下有疾醫者不得入宮以證取藥嗚呼何其慎也是以終明代無龍焚燕啄之妖墨敕斜封之禍不特同輦並坐者羣臣無所容其諫諍而宮闈祕邃即陰教之貞淑容儀之美麗外廷亦罕得聞焉家法之善未有如明者也上自孝慈下迄慈后考厥族里次其時代雖所遇不齊顯晦

異致而同居正號者並列於篇其妃嬪有事實者亦附見焉作后妃列傳

太祖孝慈高皇后馬氏宿州人父馬公母鄭媪早卒馬公素善郭子興嘗客濠以后託子興尋亦卒子興育之如已女子興奇太祖以后歸焉后仁慈有智鑒好書史太祖有劄記輒命后掌倉卒未嘗忘子興嘗信讒疑太祖后善事其妻嫌隙得釋太祖既克太平后率將士妻妾渡江及居江寧吳楚接境戰無虛日親緝甲士衣鞋佐軍陳友諒寇龍灣太祖帥師禦之后盡發宮中金帛犒士嘗語太祖定天下以不殺人為本太祖善之洪武元年正月太祖即帝位冊為皇后初子興子數困帝幽室中后竊炊餅懷以餉帝肉為焦歲大侵嘗貯

糗糒脯脩供帝無所乏絕而已不宿飽及貴帝德后至比之
蕪蕪豆粥滹沱麥飯嘗對羣臣述后賢同于唐長孫皇后間
以語后后曰妾聞夫婦相保易君臣相保難陛下不怠妾同
貧賤願無忘羣臣共艱難且妾何敢比長孫皇后也帝廉得
后族人欲官之后謝曰爵祿私外家非法固辭而止后既正
位益自貶損勤于內治選女史日講說古訓誠諭六宮以宋
多賢后錄其家法朝夕省覽或言宋過仁厚后曰過仁厚不
愈刻薄乎一日問女史黃老何教也而竇太后好之女史曰
清靜無爲爲本若絕仁棄義民復孝慈是其教矣后曰孝慈
卽仁義也詎有絕仁義而爲孝慈者哉后嘗誦小學請帝表
章焉帝前殿決事或震怒后伺帝還宮輒隨事微諫雖帝性

不可犯然爲緩刑戮者數矣叅軍郭景祥守和州人言其子
持稍欲殺父帝將誅之后曰景祥止一子人言或不實殺之
絕其後矣帝廉之果枉乃釋李文忠守嚴州楊憲誣其不法
帝欲召還后曰嚴敵境也輕易將不宜且文忠素賢憲言詎
可信帝遂已文忠後卒有功學士宋濂坐孫罪逮論死后諫
曰民家爲子弟延師尚以禮全終始况天子乎且濂家居必
不知情帝不聽會后侍帝食不御酒肉帝問故對曰妾爲宋
先生作福事也帝惻然投箸起明日赦濂安置茂州吳興富
民沈秀者助築都城三之一又請犒軍帝怒曰匹夫犒天子
軍亂民也宜誅后諫曰妾聞法也者誅不法也非以誅不祥
民富敵國民自不祥不祥之民天將災之陛下何誅焉乃釋

秀戍雲南帝嘗令重囚築城后曰罰贖至仁也但疲囚加役恐不免死亡帝乃悉赦之帝嘗怒責宮人后亦佯怒令執付宮正司議罪帝曰何爲后曰明王不以喜怒加刑賞當陛下怒時恐有畸重付宮正則酌其平矣卽陛下論罪人亦詔有司一日問帝今天下民安乎帝曰此非爾所宜問也后曰陛下天下父妾辱天下母子之安否何可不問遇歲旱輒率宮人蔬食助祈禱歲凶則設麥飯野羹帝或告以賑卹后曰賑卹不如蓄積之先備也奏事官朝散會食廷中后命中官取飲食親嘗之味弗甘遂啟帝曰人主自奉欲薄養賢宜豐帝爲飭光祿官帝幸太學還后問生徒幾何帝曰數千后曰人才衆矣諸生有廩食妻子將何所仰給于是立紅板倉積糧

賜其家太學生家糧自后始諸將克元都俘寶玉后曰元有是而不能守意者帝王自有寶歟帝曰朕知汝謂得賢爲寶耳后拜謝曰誠如陛下言妾與陛下起貧賤至今日恒恐驕縱生於奢侈危亡起於微細故願得賢人共理天下又曰法屢更必弊法弊則奸生民數擾必困民困則亂生帝嘆曰至言也命女史書之冊其規正類如此帝每御膳后皆躬自省視平居服大練浣濯之衣雖敝不忍易聞元世祖后煑故弓絃事亦命取練織爲衾裯以賜高年煑獨餘帛類絲緝成衣裳賜諸王妃公主使知蠶桑艱難妃嬪宮人被寵有子者厚待之命婦入朝待之如家人禮言及馬公鄭媪早卒輒悲鳴流涕帝感其意爲修墓置廟焉洪武十五年八月寢疾羣臣

請禱祀求良醫后謂帝曰死生命也禱祀何益且醫何能活人使服藥不效陛下不能不以妾故而殺諸醫乎疾急帝問所欲言曰願陛下求賢納諫慎終如始子孫皆賢臣民得所而已八月丙戌崩年五十一九月庚午葬孝陵諡曰孝慈皇后宮人思之作歌曰我后聖慈化行家邦撫我育我懷德難忘懷德難忘於斯萬年悲彼下泉悠悠蒼天永樂元年上尊諡曰孝慈昭憲至仁文德承天順聖高皇后嘉靖十七年上尊諡曰孝慈貞化哲順仁徽成天育聖至德高皇后后生懿文太子標秦王棧晉王櫚成祖文皇帝周王橚寧國安慶兩公主后崩太祖不復立后成穆貴妃孫氏陳州人元末兵亂妃父母俱亡從仲兄蕃避

兵揚州青軍陷城元帥馬世熊得之育爲義女年十八太祖納焉及卽位冊封貴妃位衆妃上洪武七年九月薨年三十有二賜諡帝以妃無子命周王橚行慈母服三年東宮諸王皆期敕儒臣作孝慈錄庶子爲生母服三年衆子爲庶母期自妃始葬褚崗賜兄瑛田租三百石歲供祀後祔葬孝陵皇淑妃李氏壽州人父傑洪武初以廣武衛指揮北征卒於陣十七年九月孝慈皇后服除冊封皇淑妃攝六宮事不立后而使妃攝自李氏始未幾薨

皇寧妃郭氏濠人郭山甫女山甫善相人太祖微時過其家山甫相之大驚曰公相貴不可言因謂諸子子興英曰吾相汝曹皆可封侯者以此亟遣從渡江並遣妃侍太祖後封皇

寧妃生魯王檀李淑妃薨妃攝六宮事山甫累贈營國公子
興英皆以功封侯自有傳

懿文太子妃常氏開平王遇春女洪武四年四月冊為皇太
子妃十一年十一月薨謚敬懿建文元年追尊為孝康皇后
永樂元年復稱敬懿皇太子妃祔葬於懿文陵

繼妃呂氏壽州人父本累官太常卿建文初尊為皇太后燕
兵至金川門迓太后至軍中述不得已起兵之故太后還未
至宮中已火已隨其子允熙居懿文陵永樂元年復稱皇嫂
懿文太子妃后生虞懷王雄英建文皇帝吳王允熈衡王允
燧徐王允熙

建文皇后馬氏光祿少卿全女洪武二十八年冊為皇太孫

妃建文元年二月立為皇后四年六月城陷崩于火生子文
奎文圭

成祖仁孝皇后徐氏中山王達長女也幼貞靜好讀書稱女
諸生太祖聞后賢淑一日召達謂曰朕與卿布衣交也古君
臣相契者率為婚姻卿有令女其以朕子棣配焉佳兒佳婦
足慰我兩翁達頓首謝洪武九年冊為燕王妃從王之藩居
孝慈高皇后喪三年蔬食如禮靖難兵起王往大寧李景隆
攻城急后親率將校妻環甲胄挾矢石登陴距守景隆卒不
能破建文四年七月王即帝位十一月冊為皇后嘗言南北
累年戰鬥兵民疲敝宜與休息又言當世賢才皆高皇帝所
遺陛下不宜以新舊間又言帝堯施仁自親始帝輒嘉納焉

初后弟增壽常以國情輸燕為建文帝所誅至是欲贈爵后力言不可帝不聽竟封定國公命其子景昌襲乃以告后后曰非妾志也終弗謝一日問陛下誰與圖治者帝曰六卿理政務翰林職論思后因請悉召見其命婦賜冠服鈔幣諭曰婦之事夫奚翅饋食衣服而已必有助焉朋友之言有從有違夫婦之言婉順易入吾旦夕侍上惟以生民為念汝曹勉之嘗採女憲女誠作內訓二十篇又類編古人嘉言善行作勸善書頒行天下既疾革惟勸帝愛惜百姓廣求賢才恩禮宗室毋驕畜外家又告皇太子曩者北平將校妻為我荷戈城守恨未獲隨皇帝北巡一賚卹之也永樂五年七月乙未崩年四十有六帝大悲慟為后薦大齋於靈谷天禧二寺聽

羣臣致祭光祿為具物甲午冊諡曰仁孝皇后葬天壽山仁宗即位改葬長陵上尊諡曰仁孝慈懿誠明莊獻配天齊聖文皇后后生仁宗漢庶人高煦趙王高燧永安永平永成咸寧四公主

恭獻賢妃權氏朝鮮人永樂七年冊為賢妃時朝鮮貢女充掖庭妃與焉姿質穠粹善吹玉簫帝愛憐之命其父永均為光祿卿八年十月侍帝北征凱還薨於臨城賜諡藁葬嶧縣昭獻貴妃王氏蘇州人永樂七年冊為貴妃妃有賢德事仁孝皇后恭謹為帝所重帝晚年多急怒妃曲為調護自皇太子親王公主以下皆倚賴焉十八年七月薨禮視太祖成穆孫妃

武十六年冊爲燕世子妃永樂二年冊爲皇太子妃仁宗立冊爲后宣宗卽位上尊號曰皇太后英宗卽位加上太皇太后正統七年崩合葬獻陵上尊諡曰誠孝恭肅明德弘仁順天啟聖昭皇后始爲太子妃操婦道至謹雅得成祖及仁孝皇后權而仁宗爲太子頗被漢趙二王間體肥碩復不習騎射成祖恚至減太子宮膳瀕易者數矣卒以后故得不廢旣爲后中外政事靡不周知宣宗立軍國大議多稟聽裁決是時海內泰寧帝入奉起居出奉遊宴四方貢獻雖微物必先上皇太后兩宮慈孝聞天下宣德三年太后遊西苑皇后皇妃侍帝親掖輿登萬歲山奉觴上壽獻詩頌德又明年謁

長獻二陵帝親橐鞬騎導至河橋下扶輦畿民夾道拜觀陵旁老穉皆山呼迎拜太后顧曰百姓戴君以能安之耳皇帝宜重念帝奉太后過農家召老婦問生業賜鈔幣有進蔬食酒漿者太后取以嘗帝曰此田家味也扈從臣張輔蹇義楊士奇楊榮金幼孜楊溥請見行殿太后慰勞之且曰爾等先朝舊人勉輔嗣君旣還京一日帝謂士奇曰皇太后謁陵還道汝輩行事甚習言輔武臣也達大義義重厚小心第寡斷汝克正言無避忤先帝或數不樂然終從汝以不敗事又有三事時悔不從也太后遇外戚嚴弟昇至淳謹然不許預議國事宣宗崩英宗方九歲大臣請太后垂簾聽政太后曰母壞祖宗法第悉除罷一切不急務時時勗帝向學委任股肱

以故太監王振雖寵於帝終太后世不敢專大政正統七年十月太后崩當大漸召士奇榮溥命中官問國家尚有何大事未辦者士奇舉三事其一言建庶人雖亡當修實錄其二言太宗詔有收方孝孺諸臣遺書者死宜弛其禁其三未及奏上而太后已崩遺詔勉大臣佐帝惇行仁政語甚諄篤合葬獻陵上尊諡誠孝恭肅明德弘仁順天啟聖太皇太后后生宣宗及越王瞻墉襄王瞻墀瞻墻即宣宗崩時宮中訛言太后欲取金牌召立者也

宣宗恭讓皇后胡氏名善祥濟寧人父榮生七女洪武初長女入宮爲女官榮授錦衣衛百戶后其第三女也永樂十五年冊爲皇太孫妃久之爲皇太子妃宣宗踐阼立爲皇后后

善病時孫貴妃有寵后未有子二年冬貴妃生子帝即立爲太子令后上表辭位乃廢后退居長安宮賜號靜慈仙師而冊貴妃爲后諸大臣張輔蹇義夏原吉楊士奇楊榮等不能爭張太后憫后賢時名居清寧宮內廷朝宴命居孫后上孫后常怏怏正統七年十月太皇太后崩后痛哭不已踰年亦崩用嬪御禮葬金山后無過被廢天下聞而憐之宣宗後亦悔焉天順六年孫太后崩錢皇后爲英宗言帝非孫太后出且胡后賢而無罪廢爲仙師其歿也人畏太后殮葬皆不如禮因勸復其位號英宗問大學士李賢賢對曰陛下此心地鬼神實臨之然臣以陵寢享殿神主俱宜如奉先殿式庶稱陛下明孝七年七月上尊諡曰恭讓誠順康穆靜慈章皇

后修陵寢不耐廟人終不知英宗生母誰氏也

宣宗孝恭皇后孫氏鄒平人幼有美色宣宗爲太孫時彭城伯張麒妻故永城人也言於成祖曰孫氏有賢女遂得入宮方十餘歲命誠孝皇后育之已而成祖爲太孫選濟寧胡氏爲妃而以后爲嬪后與胡繆爲親厚宣宗卽位冊胡氏爲皇后而以后爲貴妃故事皇后金寶金冊皇貴妃而下有冊無寶獨后有寵得請於太后製金寶貴妃有金寶自此始寵幸逼皇后矣未幾胡氏遘疾貴妃伴厚視之而陰行計宮中子宮人子於是妃眷寵日重后遂上表遜位請早定國本妃猶僞辭曰后病痊自有子吾子敢先后子耶宣德三年三月癸未竟冊爲皇后子爲皇太子是爲英宗十年二月英宗立尊

爲皇太后十四年八月英宗北狩太后用于謙策命郕王監國社稷復安郕王卽位尊爲上聖皇太后英宗在迤北數寄禦寒衣裘及幽南宮數入省視石亨等謀奪門密白太后許之英宗復辟上徽號曰聖烈慈壽皇太后明興宮闈徽號亦自此始天順六年九月后崩上尊諡曰孝恭懿憲慈仁莊烈齊天配聖章皇后合葬景陵

賢妃吳氏景皇帝母也丹徒人父彥名見外戚傳宣德中冊爲賢妃景帝卽位尊爲皇太后英宗復辟復稱宣廟皇賢妃成化中薨

郭嬪諱愛字善理鳳陽人賢而有文入宮二旬而卒自知死期書楚聲以自哀詞曰修短有數兮不足較也生而如夢兮

死則覺也先吾親而歸兮慚予之失孝也心悽悽而不能已
兮是則可悼也

正統元年八月追贈皇庶母惠妃何氏爲貴妃諡端靜趙氏
爲賢妃諡純靜吳氏爲惠妃諡貞順焦氏爲淑妃諡莊靜曹
氏爲敬妃諡莊順徐氏爲順妃諡貞惠袁氏爲麗妃諡恭定
諸氏爲淑妃諡貞靜李氏爲充妃諡恭順何氏爲成妃諡肅
僖冊文曰茲委身而蹈義隨龍馭以上賓宜薦徽稱用彰節
行蓋宣廟殉葬宮妃也初太祖崩宮人多從死者建文永樂
時相繼優恤若張鳳李衡趙福張璧汪賓諸家自錦衣衛所
試百戶散騎帶刀舍人進千百戶帶俸世襲人謂之太祖朝
天女戶歷成祖仁宣二宗亦皆用殉景帝以郕王薨猶用其

制蓋當時王府皆然至英宗遺詔始罷之

英宗孝莊皇后錢氏海州人父都督同知貴見外戚傳正統
八年立爲后英宗閔后族單微欲侯之后輒遜謝故后家獨
無封英宗北狩傾中宮貲佐迎駕夜哀泣顙天倦卽卧地損
一股以哭泣復損一目英宗在南宮不自得后曲慰解后無
子周貴妃有子立爲皇太子英宗臨崩遺命曰錢皇后千秋
萬歲後與我同葬大學士李賢退而書之冊憲宗立上兩宮
徽號下廷臣議太監夏時希貴妃意傳諭獨尊貴妃爲皇太
后大學士李賢彭時力爭乃兩宮並尊而稱后爲慈懿皇太
后以別於周太后及營裕陵彭時復告賢穴宜三遂具疏言
之詔下廷議夏時復言不可事竟寢成化四年太后崩周太

后不欲后合葬帝使夏時懷恩召大臣議彭時首對曰合葬裕陵主祔廟定禮也禮部尚書姚夔贊時言翼日帝召問時仍力請合葬帝曰朕豈不知慮他日妨母后耳時曰皇上孝事兩宮聖德彰聞禮之所合孝之所歸也商輅亦言不祔葬損聖德劉定之曰孝從義不從命帝默然久之曰不從命尚得爲孝耶時力請合葬裕陵左而虛右以待周太后已復與大臣疏爭帝再下廷議吏部尚書李秉禮部尚書夔集廷臣九十九人議皆請如時言合葬同祔帝曰卿等言是顧朕屢請太后未得命乖禮非孝違親亦非孝明日詹事柯潛給事中魏元等疏上又明日尚書夔等合疏上皆執議如初中旨猶諭別擇葬地于是百官伏哭文華門外帝諭羣臣退衆叩

頭不得旨不敢退自己至申乃得命允衆呼萬歲出事詳時夔傳中是年七月上尊謚孝莊獻穆弘惠顯仁恭天欽聖睿皇后九月合葬裕陵異隧距英宗穴數丈許中室之虛右墻以待周太后其隧獨與英宗穴通而奉先殿祭復不奉錢太后配弘治十七年周太后崩詔禮部集羣臣會議孝宗御便殿出裕陵圖指示大學士劉健謝遷李東陽曰陵有二隧若者室若者可往來大非禮當釐正又曰此皆當日內臣所爲昨見成化間彭時姚夔等章奏先朝大臣爲國如此健遷對曰英宗皇帝遺命合葬先臣李賢記於闕中帝曰奈何違之東陽對曰以周太后故先帝委曲至此帝曰先帝亦不得已耳欽天監言通隧上千先帝陵堂恐動地脉朕意不爾因以

指畫紙曰窳則天地閉塞通則風氣流行健等因力贊帝復問祔廟禮健等言祔二后自唐始也祔三后自宋始也漢以前一帝一后曩者定議合祔配享孝莊太后居左今大行太皇太后居右且引唐宋故事爲証臣等以此不敢復論帝曰二后已非況復三后遷曰宋祔三后一繼立一生母也帝曰事須師古太皇太后鞠育朕躬朕豈敢忘顧私情耳祖宗來一帝一后今並祔壞禮自朕始且奉先殿祭皇祖特座一飯一匙而已夫孝穆皇太后朕生母也別祀之奉慈殿今仁壽宮前殿稍寬朕欲奉太皇太后於此他日奉孝穆皇太后於後歲時祭享如太廟於是命羣臣詳議禮部集衆議上將建新廟奉享已而欽天監奏年方有礙廷議請暫祀周太后於

奉慈殿稱孝肅太皇太后殿在奉先殿西帝初祀孝穆於奉慈殿至是中奉孝肅而徙孝穆居左焉帝始欲通隧亦以陰陽家言寢不行後乃卽陵殿移英宗神座居中孝莊居左孝肅居右

孝肅周太后英宗妃憲宗生母也昌平人父錦衣千戶能見外戚傳后生憲宗及崇王見澤天順元年冊爲皇貴妃憲宗卽位尊爲皇太后成化元年春太后誕日令僧道建齋祭禮部尚書姚夔率羣臣詣僧寺爲太后祈福給事中張寧劾夔憲宗是其言二十三年上徽號曰聖慈仁壽皇太后孝宗卽位尊爲太皇太后先是憲宗在位事太后至孝五日一朝燕饗必親太后意所欲惟恐不懽至錢太后合葬裕陵太后殊

難之憲宗委曲寬譬得請乃已而孝宗生西宮母紀氏暴薨
太后育之宮中省視萬方以故孝宗事太后亦至孝太后病
瘍久之病已誥諭羣臣曰粵自英皇厭代予正位長樂憲宗
皇帝以天下養二十四年猶一日茲予偶患瘍皇帝夜顙天
為予請命春郊罷宴問視惟勤俾老年疾體獲底康寧以昔
視今父子兩世孝同一揆予甚嘉焉弘治十一年冬清寧宮
災太后遷居仁壽宮明年清寧宮成迺還居焉太后弟長寧
伯或家有賜田有司請釐正之帝未許也太后曰奈何以我
故飢皇帝法使歸地於官弘治十七年三月太后崩諡孝肅
貞順康懿光烈輔天承聖睿皇后合葬裕陵孝宗與大學士
劉健李東陽謝遷議立奉慈殿別祀不祔廟遂罷諡仍稱太

皇太后語在錢皇后傳嘉靖十五年遷后奉慈殿主與紀邵
二太后並祀陵殿不繫帝諡以別嫡庶其後穆宗母孝恪神
宗母孝定光宗母孝靖熹宗母孝和莊烈帝母孝純咸遵用
其制

景帝廢后汪氏順天人父中城兵馬指揮瑛見外戚傳正統
十年冊為郕王妃十四年冬王即帝位冊為皇后后有賢德
嘗念京師諸死事及老弱遇害者暴骨原野令官校掩埋之
生二女無子景泰三年妃杭氏生子見濟景帝欲立為皇太
子而廢憲宗后執不可以是忤帝意遂廢后而立杭氏為皇
后后父昱因累陞錦衣衛指揮使七年杭氏卒諡肅孝祔廟
及英宗復位削杭后封號遷別室而后仍稱王妃景帝崩英

宗以其妃唐氏等殉議及后李賢曰妃已幽廢况兩女幼尤可憫帝乃已而憲宗時爲太子雅知妃不欲廢立事之甚恭因爲帝言遷妃外王府得盡攜宮中所有而出與周太后相得甚歡歲時入宮叙家人禮然后性剛執一日英宗問太監劉桓日記有玉玲瓏繫腰今何在桓言當在后所英宗命索之后投諸井而對使者曰無之已而告人曰七年天子不堪消受此數片玉耶已有言后出所攜鉅萬計英宗遣使檢取之遂立盡正德元年十二月薨廷議祭葬禮王鏊曰葬以妃祭以后遂合葬金山明年上尊諡曰貞惠安和景皇后憲宗廢后吳氏順天人天順八年七月立爲皇后父俊以女貴進都督同知先是憲宗居東宮萬貴妃已擅寵后旣立攝

其過杖之帝怒乃下詔先帝爲朕簡求賢淑已定王氏育於別宮待期太監牛玉擅將選退吳氏於母后前復選冊立禮成之後朕見舉動輕佻禮度率畧德不稱位因察其實始知非預立者用是不得已請命母后廢吳氏別宮立甫二月耳遂成后父吳俊并謫玉孝陵種菜玉姻家懷寧侯孫鏜閒住從子太常少卿綸甥吏部員外郎楊琮並除名南京給事中王徽王淵朱寬李翔李鈞等遂劾玉并大學士李賢帝怒徽等皆貶邊州州判後孝宗生於西宮后保抱惟謹孝宗卽位念后恩命服膳皆如母后禮官其姪錦衣百戶正統元年薨劉瑾欲焚之王鏊持不可乃以妃禮葬孝貞皇后王氏上元人父中軍都督鎮見外戚傳初憲宗在

東宮英宗爲擇配得十二人選后及吳氏柏氏留宮中意頗屬后及卽位左右爲吳地遂冊吳爲后已而吳后廢冊爲皇后天順八年九月也萬貴妃寵冠後宮后處之澹如孝宗卽位尊爲皇太后武宗卽位尊爲太皇太后正德五年加上尊號慈聖康壽太皇太后十三年二月己卯崩上尊諡曰孝貞莊懿恭靖仁慈欽天輔聖純皇后合葬茂陵祔太廟

孝穆紀太后憲宗妃孝宗生母也賀縣人本蠻土官女成化中征蠻俘入掖廷受女史警敏通文命守內藏時萬貴妃顯寵而妬後宮有娠者皆治使墮柏賢妃生悼恭太子亦爲所害帝行內藏妃應對稱旨悅之一幸有身萬貴妃知而恚甚令婢釣治之婢移報曰病痞乃謫居安樂堂久之生孝宗使

門監張敏溺焉敏驚曰上未有子奈何棄之稍哺粉餌飴蜜藏之他室貴妃日伺無所得至五六歲未敢剪胎髮當是時吳后廢居西內近安樂堂密知其事往來哺養帝不知也帝自悼恭太子薨數數視影躑躅中外羣臣皆知以貴妃故恐皇嗣不可復望私爲帝憂成化十一年帝一日召敏櫛髮照鏡嘆曰老將至而無子敏伏地曰死罪萬歲已有子也帝愕然問安在對曰奴言卽死萬歲當爲子主於是太監懷恩頓首曰敏言是皇子潛養西內今已六載矣匿不敢聞帝大喜卽日幸西內遣使往迎皇子使至宣詔妃抱皇子泣曰兒去吾不得生兒見黃袍有鬚者卽兒父也皇子衣小緋袍乘小輿擁至階下髮披地走投帝懷帝置之膝撫視久之悲喜泣

下曰我子也類我使懷恩赴內閣具道其故羣臣皆大喜明日入賀頒詔天下移妃居永壽宮數召見萬貴妃日夜泣怨曰羣小給我其年六月妃暴薨或曰貴妃使使賜妃死或曰自縊也賜諡恭恪莊僖淑妃敏懼亦吞金死敏同安人孝宗既立爲皇太子時孝肅皇太后居仁壽宮語帝曰以兒付我太子遂居仁壽一日貴妃召太子食孝肅謂太子曰兒去無食也太子至貴妃賜食曰已飽進羹曰羹疑有毒貴妃大恚曰是兒數歲卽如是他日魚肉我矣因恚而成疾孝宗卽位追封淑妃皇太后諡孝穆慈慧恭恪莊僖崇天承聖純皇后遷葬茂陵別祀奉慈殿帝悲念太后特遣太監蔡用之賀求太后家得紀父貴紀祖旺兄弟以聞帝大喜詔改父貴爲貴

授錦衣衛指揮同知祖旺爲旺授錦衣衛指揮僉事賜予第宅金帛莊田奴婢不可勝計追贈太后父爲中軍都督府左都督母爲夫人其曾祖祖父亦如之遺修太后先塋之在賀者置守墳戶復其家先是太后在宮中嘗自言家賀縣姓紀幼不能知親族也太監郭鏞陸愷皆闕之愷亦廣西人故姓李鏞中紀李同音因妄稱太后兄令人訪其叔福與兄詣京師而福等已死愷女兄夫韋父成者出冒之有司皆待以戚畹名所居里曰迎恩里貴旺曰韋猶冒李况我實李氏因詐爲宗系上有司有司莫辨也二人旣驟貴父成亦詣闕爭辨帝命郭鏞聽之鏞但逐父成而已及帝使使者修治賀先塋蠻李姓者數輩皆稱太后家自言使者使者還奏貴旺不實

復遣給事中孫珪御史滕祐間行連賀間微服入瑤獐中訪之盡得其狀歸奏帝謫罰鏞等有差戍貴旺邊海自此帝數求太后家竟不得弘治三年禮部尚書耿裕奏曰粵西當大征之後兵燹饑荒人民奔竄歲月悠遠踪跡難明昔孝慈高皇后與高皇帝同起艱難化家爲國徐王親高皇后父當后之身尋求家族尚不克獲然後立廟宿州春秋祭祀今紀太后幼離西粵入侍先帝連賀非徐宿中原之地嬪宮無母后正位之年陛下訪詢雖切安能得其要領哉臣愚謂可仿徐王故事定擬太后父母封號立祠桂林致祭帝曰孝慈皇太后早棄朕躬每一思念怒焉如割初謂宗親尚可勿求寧受百欺冀獲一是卿等爲世久無從物色請加封立廟以慰聖

母地下之孝朕虛有此心終天痛之於是封后父推誠宣力武臣特進光祿大夫柱國慶元伯諡端僖后母伯夫人立祠桂林府有司歲歲祀大學士尹直撰哀冊有云覩漢家堯母之門增宋室仁宗之慟帝燕閒念誦輒歔歔流涕也孝惠邵太后憲宗妃興獻主母也父林昌化人入杭淘沙貧甚鬻其女於鎮守太監妃由此入宮知書有容色成化十二年冊爲宸妃尋封貴妃貴妃生三子興王祐杭岐王祐榆雍王祐樓興王之藩貴妃不得從世宗入繼大統貴妃老目眇矣喜其孫爲皇帝摸世宗身自頂至踵已進封爲皇太后嘉靖元年又上尊稱曰壽安皇太后十一月庚申太后崩帝欲祔葬茂陵數下廷議禮部尚書毛澄等不敢力爭大學士楊

廷和等言祖陵不當數興工作驚動神靈今欲耐壽安於茂
陵恐憲廟在天之靈不安帝不從卒葬茂陵上尊諡曰孝惠
永嘉溫恒懿順協天祐聖皇后別祀奉慈殿尋遷主陵廟稱
皇后與孝肅孝穆等

貴妃萬氏諸城人小字貞兒父貴為邑掾吏坐事謫居霸州
見外戚傳妃生四歲遷入掖廷為孫太后宮女及長侍憲宗
於東宮憲宗年十六即位妃已三十有五矣寵之頗房遂請
廢皇后吳氏妃機警諷變善迎帝意六宮希得進御帝每遊
幸妃戎服前驅成化二年正月生皇第一子帝大喜為道中
使祈諸山川遂冊封貴妃皇子未暮薨貴妃亦自是不復
矣當是時帝未有子言者每勸溥恩澤然未敢顯言也

惟給事中李森言之四年秋彗星屢見大學士彭時尚書姚
夔復以為言帝曰內事也朕自主之尋給事中魏元御史康
永韶等疏入皆不聽妃益驕中官用事者一忤意立見斥逐
掖廷御幸有身飲藥傷墮者無數孝宗之生頂寸許無髮者
藥所中也孝宗母紀淑妃之死實妃為之佞倖錢能覃勤汪
直梁芳章典輩皆假貢獻科斂民財傾竭府庫邀結貴妃歡
戕害善良弄兵構禍民無寧日奇技淫巧禱祠宮觀糜費無
筭居久之芳等懼他日太子立將治已罪說貴妃勸帝易太
子而立興王貴妃然之因要帝易儲會泰山震羣臣奏應在
東宮帝心懼事乃寢二十三年春貴妃薨帝輟朝七日諡曰
恭肅端愼榮靖葬天壽山弘治初御史曹璘請削貴妃諡號

魚臺縣丞徐頊請逮治診視紀太后諸醫捕萬氏家屬究問
當時暴薨狀孝宗仁厚重違先帝意已之

直梁
藥中
蘇武
永路
夔
列傳第一

明史藁

列傳第二

光祿大夫 經筵講官明史總裁戶部尚書加七級 臣王鴻緒奉

敕編撰

后妃下

孝宗孝康張皇后

慈孝蔣太后

武宗孝靜夏皇后

世宗孝潔陳皇后

張廢后

孝烈方皇后

孝恪杜太后

穆宗孝懿李皇后

孝定李太后

神宗孝端王皇后

孝靖王太后

鄭貴妃

光宗孝元郭皇后

孝和王太后

孝純劉太后

李康妃

李莊妃

趙選侍

熹宗懿安張皇后

張裕妃

莊烈帝周愍皇后

田貴妃

孝宗孝康皇后張氏興濟人母金夢月入懷而生后成化二十三年選為太子妃孝宗即位立為后帝頗優禮外家后父繼追封昌國公弟鶴齡壽寧侯延齡建昌伯姻黨授官者甚眾又為后立家廟於興濟工作壯麗數年始畢鶴齡延齡出入宮禁縱家人為奸利帝輒優容之當此之時壽寧侯權勢傾天下河決山東副使楊茂元言水陰類應在後宮后怒帝

徵茂元至予杖謫之武宗即位尊為皇太后五年進慈聖皇太后世宗入繼進聖母昭聖慈壽皇太后再進聖母昭聖康惠慈壽皇太后已用張璁議改稱伯母十五年進昭聖恭安康惠慈壽皇太后二十年八月崩謚曰孝康靖肅莊慈哲懿翊天贊聖敬皇后合葬泰陵祔廟后生武宗及蔚王厚燁先是武宗崩國統中絕江彬等懷不軌賴后與大學士楊廷和等定策禁中迎立世宗而世宗事后顧日益薄元年大婚初傳昭聖懿旨既復改壽安廷和爭之乃止三年興國太后誕節敕命婦朝賀燕賚倍常及后誕日赦免賀修撰舒芬疏諫奪俸御史朱泚馬明衡陳逅季本員外郎林惟聰等先後力爭皆逮詔獄竟罷朝賀初興國太后以藩妃入號國母太后

猶以故事遇之帝頗不悅及帝朝太后待之又倨會太后弟延齡爲人上變帝故坐延齡謀逆論死太后窘迫無所出哀冲太子生請入賀帝謝不見使人請不許大學士張孚敬亦爲延齡請帝手敕曰天下者高皇帝之天下孝宗皇帝守高皇帝法卿慮傷伯母心豈不慮傷高孝二廟心耶孚敬復奏曰陛下嗣位時用臣言伯母皇太后朝臣歸過陛下至今未已茲者大小臣工默無一言誠幸太后不得令終以重陛下過耳夫謀逆之罪獄成當坐族誅昭聖獨非張氏乎陛下何以處此冬月慮囚帝又欲殺延齡孚敬復力爭乃止亾何奸人劉東山告變并捕鶴齡下詔獄久之瘐死太后至衣敝襦席藁爲請益不聽御史陳讓從獄中上書詞甚迫切乃械死

東山及太后崩帝竟殺延齡事詳外戚傳

慈孝太后蔣氏世宗母也父敦大興人追封玉田伯弘治五年冊爲興王妃世宗入承大統卽位三日遣使詣安陸奉迎而令廷臣議推尊禮咸謂宜考孝宗而稱興王爲皇叔父妃爲皇叔母議三上不允進士張璵持異議帝乃喜語具興王及璵傳妃將至禮臣具入宮儀由崇文門入東安門皇帝迎於東華門不許再議自正陽門進大明承天端門午門之東從玉門入宮又不許崇文門者京師東門也正陽門者京師正門也中爲御道玉門諸王所出入門也敕曰聖母至從御道入朝太廟故事王妃無謁廟禮又具王妃儀仗迎帝曰駕太后車服太后服妃至通州聞考孝宗恚曰安得以我子爲

他人子留不進帝聞之涕泣啓慈壽皇太后願避位羣臣惶
懼改稱興獻太后乃入以太后儀謁奉先奉慈二殿不廟見
頃之又欲稱興獻皇太后羣臣力爭謂稱皇非是大學士楊
廷和至辭位去不聽會清寧宮旁室災論者歸咎於議禮乃
稱興國太后後三年上尊號曰本生章聖皇太后當是時張
璉桂萼等益盛氣與羣臣辨謂帝宜考興獻帝而母興獻后
帝竟用其言以是年秋尊妃爲聖母章聖皇太后五年睿宗
世廟成奉妃入謁大學士石瑄諫不聽七年上尊稱曰慈仁
九年頒所製女訓於天下十五年上尊稱曰康靜貞壽十六
年奉后幸金山謁陵命諸臣進賀行殿十七年十二月崩諭
禮工二部將改葬獻皇帝於大峪山以駙馬都尉京山侯崔

元爲奉迎行禮使兵部尙書張瓚爲禮儀護行使指揮趙俊
爲吉凶儀仗官翊國公郭勛知聖母山陵事已帝親幸大峪
相視復令議奉太后南詣合葬而禮部尙書嚴嵩等言靈駕
北來慈宮南詣其一舉耳顯陵遠在承天陛下春秋念之遷
於大峪朝發夕至臣謂如初議便帝曰成祖豈不思皇祖耶
何以南孝陵因止崔元等妨行而令趙俊往且啟視幽宮因
上尊諡曰慈孝貞順仁敬誠一安天誕聖獻皇后明年俊歸
謂顯陵不吉遂議南巡九卿大臣許讚等諫不聽左都御史
王廷相又諫帝曰朕豈空行哉爲吾母耳已而侍郎呂柟給
事中曾烜御史劉賢郎中岳倫太學生陳良鼎等復相繼疏
諫不聽良鼎下錦衣衛獄三月帝至承天謁獻陵作新宮焉

曰待合葬也歸過慶都御史謝少南言慶都有堯母墓佚於祀典請祀之帝曰帝堯父母異陵可知合葬非古卽拜少南左春坊左司直兼翰林院檢討定議葬大峪山四月帝謁長陵諭嚴嵩曰大峪不如純德仍命崔元護梓宮南附七月合葬顯陵主耐睿宗廟

武宗孝靜皇后夏氏上元人父儒見外戚傳正德元年立爲后嘉靖元年上尊稱曰莊肅皇后十四年正月崩禮臣上喪儀帝曰嫂叔無服且兩宮在上朕服青臣民如母后服禮部尙書夏言曰皇上以嫂叔絕服則羣臣不敢素服見皇上請暫罷朝參許之已而議諡大學士張孚敬曰大行皇后上嫂也與累朝元后異宜用二字或四字李時曰宜用八左都御

史王廷相吏部侍郎霍韜等曰均帝后也何殊言集衆議因奏曰古人尙質諡法簡稱其行後人增加臣子情也生今世宜行今制大行皇后宜如列聖元后諡二四及八於禮無據帝不從命再議羣臣請如孚敬言帝曰用六合陰數焉於是上諡孝靜莊惠安肅毅皇后十五年卒從夏言議改諡孝靜莊惠安肅溫誠順天偕聖毅皇后合葬康陵耐廟

世宗孝潔皇后陳氏元城人父諸生萬言見外戚傳嘉靖元年昭聖皇太后爲帝選婚得后立焉帝性嚴厲一日張方二妃進茗帝循視其手后恚投杯起帝大怒后悸墮妊崩喪禮從殺素服御西角門十日卽元冠元裳御奉天門諡曰悼靈別葬襖兒峪葬之日梓宮出玉門百官一日臨給事中王汝

梅諫不聽十五年禮部尙書夏言議請改諡時帝意久釋矣乃改諡曰孝潔隆慶初禮臣議孝潔皇后大行皇帝元配也宜合葬祔廟若遵遺制祔孝烈則舍元配也若同祔則二后也大行皇帝升祔時宜奉孝潔配遷葬永陵孝烈移重陵廟穆宗從其議上尊諡孝潔恭懿慈睿安莊相天翊聖肅皇后廢后張氏世宗第二后也初封順妃七年陳皇后崩遂立爲后是時帝方追古禮每歲祭皇后必從分獻宗廟又率嬪御親蠶東郊又日率妃夫人聽講章聖女訓於宮中十三年廢居別宮十五年薨喪葬儀視宣宗胡廢后孝烈皇后方氏世宗第三后也江寧人父錦衣千戶銳具外戚傳帝卽位且十年未有太子大學士張璁言古者天子立

后並建六宮三夫人九嬪二十七世婦八十一御妻所以廣嗣也陛下春秋鼎盛宜博求淑女爲子嗣計從之明年后與鄭氏王氏閻氏韋氏沈氏盧氏沈氏杜氏同冊爲九嬪冠九翟冠大采鞠衣圭用次玉黻文冊黃金塗視皇后殺五分之一至期帝袞冕告太廟還服皮弁御華蓋殿傳制遣大臣行冊禮既冊從皇后朝奉先殿禮成帝服皮弁受百官賀蓋創禮也張后廢遂立爲后而封沈氏爲宸妃閻氏爲麗妃故事立后謁內廟而已帝謂天子立三宮以承宗廟禮經有廟見之文下禮臣議是月御奉天殿遣太傅郭勛少傅張孚敬持節冊后帝率謁太廟及世廟越三日頒詔天下明日受命婦朝二十一年曹妃宮婢楊金英等謀弒逆賴后救得免磔金

英等并及妃帝德后進銳爵爲侯久之始知曹妃冤死初曹妃有色帝愛之冊爲端妃當金英等伺帝熟寢以組縊帝項誤爲死結氣得不絕同事張金蓮等知事不就走告后后馳至解組帝蘇后命內監張佐等捕宮人雜治言金英等弑逆王寧嬪首謀又曰曹端妃雖不與亦知謀時帝病悸不能言后傳帝命收曹妃及金英等悉磔於市并收斬其族屬十餘人然妃實不知也以寵故及於難帝遂銜后二十六年十一月乙未宮中火中官請救后帝不應后遂崩詔以元后禮葬預名葬地曰永陵諡孝烈親定諡禮視昔加隆焉禮成頒詔天下二十八年十一月大祥禮臣請安主奉先殿東夾室帝曰奉先東夾室非正也可卽祔太廟大學士巖嵩尙書徐階

等詳議之嵩等言祔祖姑禮也請歲時饗獻則入太廟藏主則幄憲廟皇祖妣之右以從祔於祖姑之義帝曰祔禮至重豈可權就后非帝乃配帝者自有一定之序安有享從此而主藏彼之禮其祧仁宗祔以新序卽朕位次勿得亂禮嵩曰祔新序非臣下所敢言帝曰孝慈皇后有故事嵩曰陰不可當陽位乃命姑藏主睿皇后側以待再期明年再期帝終欲祔后太廟命再議徐階復言不可都給事中楊思忠主階議餘無言者帝震怒於是階思忠惶恐言周建九廟三昭三穆率六世而祧至後兄弟相及亦有不及六世者國朝廟制同堂異室與周禮不同今太廟九室皆滿若以聖躬論仁宗當祧固不待言此異日聖子神孫之事陛下言之是自預廟也

臣聞夏人之廟五商以七周以九禮由義起五可七七可九
九之外亦可加也請於太廟及奉先殿各增二室以祔孝烈
母祧仁宗陛下亦無預焉帝曰臣子之誼當祧當祔力請可
也苟禮矣何避豫爲於是階等復言唐虞夏五廟其祀皆五
世四世周九廟三昭三穆然而兄弟相及亦不能盡足六世
今仁宗爲皇上五世祖以聖躬論仁宗於禮當祧禮曰天子
與后猶日之與月陰之與陽相須而成天子修男教父道也
后修女順母道也請祧仁宗祔孝烈皇后於太廟第九室以
明典禮疏入因上祧祔儀注已而請忌日祭帝猶銜前議報
曰孝烈所奉者入繼之君忌不祭亦可階等惶恐請益力帝
曰非天子不議禮后當祔廟朕諭已久顧飾繁言以惑衆聽

因諭嚴嵩等曰禮官從朕言勉強耳卽不忍祧仁宗且置后
主別廟異日任臣下裁處忌日別祭可也於是禮臣不敢復
言第請如敕行乃許之後二年楊思忠爲賀表觸忌予杖削
籍隆慶初上尊諡曰孝烈端順敏惠恭誠祇天衛聖皇后穆
主弘孝殿

孝恪杜太后世宗妃穆宗生母也大興人父林嘉靖初封康
嬪久之進爲妃三十三年正月薨是時穆宗以裕王居邸帝
下禮部議喪禮尙書歐陽德請輟朝五日裕王主喪事遵高
皇帝孝慈錄斬衰三年帝不許輔臣言高帝嘗命周王橐爲
孫貴妃服矣慈母猶爾况生母乎帝命比賢妃鄭氏故事諡
榮淑康妃葬金山穆宗立尊諡孝恪淵純慈懿恭順贊天開

聖皇太后遷祔永陵祀主神霄殿追封林為慶都伯而命其子繼宗嗣

穆宗孝懿皇后李氏昌平人父銘以女貴封德平伯穆宗為裕王册為妃生憲懷太子嘉靖三十七年薨葬金山穆宗即位諡曰孝懿皇后神宗即位加上尊諡曰孝懿貞惠順哲恭仁儷天襄聖莊皇后合葬昭陵祔太廟

孝安皇后陳氏穆宗次后也通州人父景行以女貴封固安伯隆慶元年册為后后無子多病出居別宮神宗即位上徽稱曰仁聖皇太后六年進貞懿十年進康靜二十四年七月崩諡曰孝安貞懿恭純溫惠佐天弘聖皇后祀奉先殿別室孝定李太后穆宗妃神宗生母也鄆縣人父偉以女貴為武

清伯見外戚傳初為宮嬪進貴妃生神宗進皇貴妃萬曆元年上徽稱曰慈聖皇太后故事天子立尊皇后為皇太后若有生母稱皇太后則加徽號以別之時馮保欲媚帝生母風大學士張居正以並尊於是下議尊皇后曰仁聖皇太后皇貴妃曰慈聖皇太后始無別矣仁聖居慈慶宮慈聖居慈寧宮居正請太后護視帝乃徙居乾清太后主持國是專任居正帝或不讀書即召使長跪每御講筵入常令效講臣進講於前當朝五更至帝寢所呼曰帝起敕左右掖帝坐取水為盥面挈之登輦以出故帝宮中起居最嚴大瑞奉太后旨者往往挾持太過帝嘗在西城曲宴慈寧兩內侍令歌新聲辭不能帝醉怒取劍擊之為諸奄所解戲割其髮翼日太后

傳語閣臣居正具劄切諫令爲帝草罪已御札又召帝長跪數其過至云天下大器豈獨爾可承耶宮中有傳於帝者曰太后令馮保向閣中取霍光傳矣以是帝銜二人甚特屈於太后未敢發六年帝大婚太后將返慈寧宮敕居正謂吾不能視皇帝朝夕先生親受先帝付託其朝夕納誨終先帝憑几之誼三月進徽號曰宣文十年進明肅十二年同仁聖謁山陵二十九年進貞壽端獻三十四年進慈聖宣文明肅貞壽端獻恭熹四十二年二月崩上尊諡曰孝定貞純欽仁端肅彌天祚聖皇太后合葬昭陵別祀崇先殿后性慈惻好佛天下名勝地多置梵刹動費鉅萬時天下晏安物力充足帝亦助施無算初光宗未冊立給事中姜應麟等請立東宮被

謫太后聞之弗善也一日帝入侍太后問其故帝曰彼都人子也內廷呼宮人曰都人太后亦由宮人進遂大怒曰爾亦都人子帝伏地不敢起羣臣請福王之藩行有日矣鄭貴妃欲遲之明年以祝太后誕爲解太后曰吾潞王亦可來上壽乎貴妃乃不敢留福王御史曹學程以建言論死太后憐其母老言於帝釋學程后生神宗及靖王潞王

神宗孝端皇后王氏餘姚人生京師父偉以女貴封永年伯見外戚傳后性端謹光宗在東宮危疑者數矣調護備至事孝定太后得其懽心鄭貴妃顛寵后不較也正位中宮者四十年以慈孝稱萬曆四十八年四月崩諡孝端先葬定陵光宗卽位上尊諡曰孝端貞恪莊惠仁明婉天毓聖顯皇后會

帝崩熹宗立始舉大禮焉主祔廟同后册封者有宣懿康昭
劉妃嘗居慈寧宮掌太后璽年八十六至崇禎十五年薨
孝靖王太后神宗妃光宗生母也父天瑞以女貴封永寧伯
太后初爲慈寧宮宮人年長矣帝過慈寧私幸之有身故事
宮中承寵必有賞賚文書房內奄卽記年月及所賜以爲驗
時帝諱之故左右無一言者一日侍慈聖宴語及之帝不應
慈聖命取內起居注示帝且好語曰吾老矣猶未有孫果男
者宗社福也毋以子貴寧分差等耶十年四月封恭妃八月
光宗生是爲皇長子旣而鄭貴妃生皇三子進封皇貴妃而
后不封三十四年元孫生加慈聖徽號始進皇貴妃光宗每
至后宫鄭貴妃卽使人伺焉四十年病革光宗至宮門猶閉

扶鑰而入后目眇手光宗衣而泣曰兒長大如此我死何恨
遂薨光宗泣左右皆泣大學士葉向高言皇太子母妃薨禮
宜從厚不報力爭乃得請謚温肅端靜純懿皇貴妃葬天壽
山光宗卽位下詔曰朕嗣承基緒撫臨萬方遡厥慶源則我
生母温肅端靜純懿皇貴妃恩莫大焉朕昔在青宮莫親温
肅今居禁闈徒痛栝棖欲伸罔極之深悰惟有肇稱乎殷禮
其準皇祖穆宗皇帝尊生母榮淑康妃故事禮部詳議以聞
熹宗卽位上尊謚曰孝靖温懿敬讓貞慈參天胤聖皇太后
遷祔定陵祀奉慈殿
皇貴妃鄭氏大興人父憲成具外戚傳妃狡媚多智初封貴
妃生皇三子進皇貴妃帝寵之顯房燕外廷頗疑妃有奪嫡

謀矣萬曆二十九年春皇長子移迎禧宮十月立爲皇太子同日封妃子爲福王皇五子爲瑞王皇六子爲惠王皇七子爲桂王當皇太子之未立也大內北上西門之西有大高元殿妃要帝謁神設密誓立其子爲太子因御書一紙緘玉合中賜妃爲符契後廷臣爭之強慈聖皇太后復堅持立長而妃又忽失懽於是遂立皇長子爲太子帝遣人取玉合封識宛然發合蟲蝕書盡矣帝悚然異之因助妃廣建祠廟以祈福先是侍郎呂坤爲按察使時集閩範圖說一書太監陳矩偶見之持以進帝帝賜妃妃重刻之坤無與也萬曆二十六年秋或撰閩範圖說跋名曰憂危竝議謂妃欲易東宮蓋言妖也妃兄國秦姪承恩以爲出於給事中戴士衡及全椒知

縣樊玉衡以士衡曾糾坤而玉衡並糾貴妃帝重謫二人而置妖言不問踰五年續憂危竝議復出當是時太子已立而疑者未已續議中所載大抵祖前議詞益詭妄時皆謂之妖書帝得之大怒敕錦衣衛按捕甚急大學士沈一貫至借以傾危同事語見郭正域沈鯉傳四十一年百戶王曰乾又告變言奸人孔學等爲巫蠱將不利于聖母及太子語亦及妃賴大學士葉向高勸帝以靜處之禍遂寢其後挺擊事起主事王之采鞠張差詞連貴妃宮奄龐保劉成等朝議洶洶貴妃聞之對帝泣帝曰外廷語不易解若須自求東宮貴妃向太子號訴貴妃拜太子亦拜帝又召見羣臣於慈寧殿令太子降諭禁株連於是張差獄遂定神宗崩遺詔封妃皇后禮

部侍郎孫如游爭之乃止崇禎三年七月薨諡恭恪惠榮和
靖皇貴妃葬銀泉山

光宗孝元皇后郭氏順天人父維城以女貴封博平伯進侯
卒兄振明襲侯后于萬曆二十九年冊為皇太子妃四十二
年十一月薨諡恭靖四十八年九月進諡恭靖端懿溫惠元
妃熹宗即位十一月上尊諡曰孝元昭懿哲惠莊仁合天弼
聖貞皇后遷葬慶陵祔廟

孝和王太后光宗妃熹宗生母也順天人父鉞以女貴追封
新城伯見外戚傳初入東宮為選侍萬曆三十二年十一月
生熹宗進才人四十七年三月薨諡昭肅恭和章懿才人光
宗即位進封皇貴妃改諡曰溫肅端靜純懿皇貴妃熹宗即

位十一月上尊諡曰孝和恭獻溫穆徽慈諧天鞠聖皇太后
遷葬慶陵祀奉先殿

孝純劉太后光宗妃莊烈帝生母也海州人後籍宛平父應
槐母徐氏初入宮為淑女萬曆三十八年十二月生莊烈愍
皇帝已失光宗意被譴薨光宗中悔恐神宗知之戒掖廷勿
言葬於西山及莊烈帝封信王進賢妃天啓中莊烈帝居勗
勤宮問近侍曰西山有申懿王墳乎曰有傍有劉娘娘墳乎
曰有每密付金錢往祭及即位上尊諡曰孝純恭懿淑穆莊
靜毗天毓聖皇太后遷葬慶陵封其弟效祖為新樂伯繼祖
及姪文炳文耀為錦衣衛指揮同知具外戚傳帝五歲失太
后問左右遺像莫能得傅懿妃自稱習太后言宮人中狀貌

有相類者命太后母瀛國太夫人徐氏指示畫工可意得也
圖成由正陽門具法駕迎入帝跪迓于午門懸之宮中呼老
宮婢視之或言似或曰否帝爲雨泣六宮皆泣以助上哀懿
妃以此得加封號故事生母忌日不得設祭服青十五年六
月帝以太后故欲追前代生繼七后同建一廟以展孝思乃
御德政殿召大學士及禮部尚書林欲楫侍郎蔣德璟等議
帝曰太廟之制一帝一后計九廟此外祧廟亦有九亦一帝
一后其繼后及生母七位旣不得入太廟又無祧廟之主卽
宮中奉先殿尚無祭也奈何德璟曰奉先殿外尚有奉慈殿
所以奉繼后及生母者雖廢可舉也帝曰奉慈殿外尚有弘
孝神霄本恩諸殿德璟曰內廷規制臣未悉孝宗建奉慈殿

嘉靖廢之而建神霄今未知尚有基址否帝曰奉慈已撤惟
奉先尚可拓也於是別置一殿祀孝純及七后云

康妃李氏光宗選侍也時宮中有二李選侍人稱東西李康
妃者西李也先是鄭貴妃進美女於光宗西李與焉最有寵
西李嘗母信王旣而公主生乃改命東李公主皇八妹也又
嘗撫視熹宗選侍旣有寵光宗卽位與鄭貴妃同居乾清宮
無何光宗不豫召大臣入帝御煖閣凭几命封選侍爲皇貴
妃選侍趣熹宗出曰欲封后帝不應禮部侍郎孫如游因對
曰今兩太后及元妃才人封號未上俟四大禮舉行後未晚
旣而帝崩鄭貴妃移別殿而選侍尚居乾清外廷恟懼皆疑
選侍欲聽政於是大學士劉一燝及吏部尚書周嘉謨兵科

都給事中楊漣御史左光斗等皆力爭選侍始移仁壽殿語
具一燥漣傳熹宗卽位遂下詔暴選侍凌毆聖母痛致崩逝
及妄覲垂簾狀而御史賈繼春與周朝瑞之揭起繼春至稱
皇八妹入井選侍雉經爭駁不已迺復下詔曰九月一日皇
考賓天大臣入宮哭臨畢因請朝見選侍阻朕煖閣司禮監
官固請乃得出既許復悔又使李進忠等再三趣回及朕至
乾清丹陛進忠等猶牽朕衣不釋甫至前宮門又數數遣人
令朕還母御文華殿也此諸臣所曰觀安乎危乎當避宮乎
不當避宮乎察選侍行事明欲要挾朕躬垂簾聽政朕蒙皇
考令選侍撫視飲膳衣服皆皇祖皇考賜也選侍侮慢凌虐
朕晝夜涕泣皇考自知其悞時加勸慰若避宮不早則爪牙

成列朕且不知若何矣選侍因毆崩聖母自忖有罪每使宮
人竊伺不令朕與聖母舊侍言有輒捕去朕之苦衷外廷豈
能盡悉乃諸臣不念聖母惟黨選侍妄生謫議輕重失倫理
法焉在朕今停選侍封號以慰聖母在天之靈厚養選侍及
皇八妹以敬遵皇考之意爾諸臣可以仰體朕心矣已復屢
旨詰責繼春繼春遂削籍去久之魏忠賢亂政四年封選侍
爲康妃五年忠賢遂修三朝要典屠戮忠義國運幾亡
莊妃李氏亦光宗選侍所稱東李者也仁慈寡言笑位素居
西李前奉光宗旨撫視信王天啓元年二月冊封莊妃魏忠
賢客氏用事惡妃持正宮中禮數多被裁損憤鬱薨葬劉賢
妃園旁崇禎初加封號給其弟成棟田千頃

選侍趙氏者光宗時未有封號熹宗卽位忠賢客氏惡之矯旨賜死選侍以光宗賜物列案上西向禮佛痛哭自經熹宗懿安皇后張氏祥符人父國紀以女貴封太康伯見外戚傳天啓元年四月冊爲皇后后性嚴正數於上前刺客氏魏忠賢過失嘗召客氏至欲繩以法客魏交恨遂誣稱后非國紀女幾搖帝聽三年后有娠客魏盡逐其宮人異已者以所私宮人承役竟損元子帝嘗至后宮后方讀書帝問何書對曰趙高傳也帝默然而出時宮門有匿名書列忠賢逆狀并及其黨忠賢疑出國紀及被逐諸臣手闖黨邵輔忠孫杰等欲因此興大獄盡殺東林諸賢而借國紀以動搖中宮冀事成則立魏良卿女爲后劉志選偵知之首上疏劾國紀梁

夢環繼之會有沮者乃已及熹宗大漸折忠賢逆謀僣位信王者后力也莊烈帝立上尊號曰懿安皇后十七年三月卒自成破都城后自縊死 順治元年

世祖章皇帝允太監曹化淳請 命合葬熹宗陵

裕妃張氏性直烈客魏恚其異已幽于別宮絕其飲食天雨妃匍匐飲簷溜而死慧妃范氏生悼懷太子不育復失寵李成妃侍寢密爲慧妃乞憐客魏知之怒亦幽成妃於別宮妃懲裕妃禍預于簷瓦間藏食物閉宮中半月不死斥爲宮人崇禎初皆復位號

莊烈帝愍皇后周氏其先蘇州人徙居大興父奎業醫繼妻丁氏生后天啓中選入信邸時神宗劉昭妃攝太后寶中宮

之政悉稟成於熹宗張后故事宮中選大婚一后以二貴人陪升中選則皇太后幕以青紗帕取金玉跳脫繫其臂不中卽以年月帖子納淑女袖侑以銀幣遣還懿安疑后弱昭妃曰今雖弱後必長大因冊爲信王妃帝卽位立爲皇后封奎爲嘉定伯具外戚傳后性嚴慎嘗以京師寇急微言曰吾南中尚有一家居帝問從何知之固不語至他政事弗預也田貴妃有寵而驕后每裁之以禮歲元日寒甚田妃來朝翟車止廡下后故良久方進御坐受其拜拜已遽下無他言而袁貴妃之朝也相見甚歡語移時田聞而大恨向帝泣帝嘗在交泰殿與后語不合推后仆地后憤不食帝尋悔使中使持貂褸以賜且問起居后勉爲一餐帝因退貴妃居啓祥宮三

月不召旣而與后於永和門看花后請召妃帝不應后遽令以車迎之乃相見如初崇禎十七年三月十八日暝都城破帝泣語后曰大事去矣后頓首曰妾事陛下十有八年卒不聽一語至有今日乃撫太子二王慟哭遣之出宮帝令后自裁后入宮宮人出奏帝猶云皇后領旨后遂先帝縊死帝又命袁貴妃自縊繫絕久之蘇帝拔劍斫其肩又斫所御妃嬪數人袁妃卒不殊福王時諡后曰孝烈皇后

世

祖章皇帝定鼎諡后曰莊烈愍皇后與帝同葬田貴妃寢園名曰思陵又命給袁妃居宅贍養終其身有宮人魏氏者當賊入宮大呼曰我輩必遭賊污有志者早爲計遂躍入御河死頃間從死者一二百人宮人費氏年十六自投晉井中

賊鈞出見其姿容爭奪之費氏給曰我長公主也羣賊不敢逼擁見李自成自成命中官審視之非是以賞部校羅某者費氏復給羅曰我實天潢義難苟合將軍宜擇吉成禮羅喜置酒極歡費氏懷利刃俟羅醉斷其喉立死因自詔曰我一弱女子殺一賊帥足矣遂自刎死自成聞大驚令收葬之皇貴妃田氏陝西人父弘遇好佚遊為輕俠妃生而纖妍母繼母也多才藝故妃似之崇禎元年冊為禮妃進皇貴妃妃寡言能伺上指知書善畫蘭鼓琴寵冠後宮宮中有夾道駕行幸御蓋行日申妃命作簾條覆之從者皆得休息又易小黃門之舁輿者為宮婢帝聞以為知禮母家本揚州宮中供設皆自江南輦致帝舊冠綴鴉青間以珠妃易珠以珮而後

尚之以石望之有光宮中燈縷金匝妃三分其圍去一以方空而以輕綃幕之欲其明也其巧思如此帝一日聞鼓琴問何師以母對因召母母入一再彈帝悅賜遣之自是注宮門籍父弘遇以妃故官左都督園亭歌伎甲都下妃生皇二子永王及皇五子皇五子薨妃亦疾十五年七月薨諡恭淑端惠靜懷皇貴妃葬昌平天壽山即思陵也

明史彙

列傳第二終

明太祖定天下之三年懲宋元孤立失古封建意於是擇名
 城大都豫王諸子待其壯而遣就藩服若秦西安晉太原燕
 趙大猷新王諸子皆其子孫而後漢唐諸國亦皆太祖所
 創大猷我天下之二平漢宋元孤立夫古封建之意豈易
 廢乎
 諸王一
 懿文太子標
 周定王橚
 潭王梓
 蜀獻王椿
 肅莊王楨
 秦愍王裒
 楚昭王楨
 趙王杞
 湘獻王柏
 代簡王桂
 晉恭王櫛
 齊王樽
 魯荒王檀
 秦愍王裒
 楚昭王楨
 趙王杞
 湘獻王柏
 代簡王桂
 晉恭王櫛
 齊王樽
 魯荒王檀

明史藁

列傳第三

光祿大夫 經筵講官明史總裁戶部尚書加七級 臣 王鴻緒奉

敕編撰

諸王一

懿文太子標

秦愍王裒

晉恭王櫛

周定王橚

楚昭王楨

齊王樽

潭王梓

趙王杞

魯荒王檀

蜀獻王椿

湘獻王柏

代簡王桂

肅莊王楨

明太祖定天下之三年懲宋元孤立失古封建意於是擇名城大都豫王諸子待其壯而遣就藩服若秦西安晉太原燕

北平其最也越數年續封於秦者爲慶爲肅於晉者爲谷爲代於燕者爲遼爲寧環邊萬里匝於三陲以固磐石蓋由建都應天去西北遼遠非親子弟不足以鎮撫而捍外患其他則分王內地用資夾輔焉考明初親王制祿歲萬石府置相傅官屬護衛甲士少者三千餘人多者至萬九千人隸籍兵部冕服車旗邸第下天子一等公侯大臣伏而拜謁禮無與鈞體至崇重矣惟列爵而不臨民分藩而不錫土與周漢封國稍異爾然諸王每奉詔征伐雖元勳宿將咸稟節制及太祖末年秦晉二王皆已薨逝成祖最習兵出塞數有功乃詔曰燕王在北平北平中國門戶其以北平都司行都司并燕谷寧三府護衛精銳馬步軍士隨燕王出開平備邊一切號

令皆自王出又敕武定侯郭英以遼東各衛兵與王會當是時成祖之威名震於西北矣建文新立未權通變遽議削奪成祖不聽命而篡取邊兵以成靖難之師不四年有天下非委寄過重積漸致然歎自是以後矯枉鑿覆法網綦密成祖封二子漢先不靖旋踵滅亡正德間寧披猖亦卽禽薙藩封之局日剝月削雖支子代有封立而恩澤遞降規制無加其舊封遠者宗派蕃昌祿秩難給末胄疏屬不免饑寒卽號稱雄藩而牽於文法長吏得以束縛之所謂維城之寄無有也卒之盜起潢池氛纏宗社名邦盡隳匡翊無聞豈太祖分封本計哉今據所紀載自秦晉諸藩以及列朝所封考其始終跡其禍敗及有行義可書者備鑒戒而追封耐廟之十五

王亦附見於簡端焉作諸王傳

熙祖二子長仁祖次壽春王俱王太后生壽春王四子長霍丘王次下蔡王次安豐王次蒙城王霍丘王一子寶應王安豐王四子六安王來安王都梁王英山王下蔡蒙城及寶應六安諸王皆無後洪武元年追封二年定從享禮祔祀祖廟東西廡壽春霍丘安豐蒙城四王皆以王妃配食十王四妃墓在鳳陽白塔祠官歲祀焉

仁祖四子長南昌王次盱眙王次臨淮王次太祖俱陳太后生南昌二子長山陽王無後次文正盱眙一子昭信王無後臨淮王無子太祖起兵諸王皆前死獨文正在洪武初諸王皆追封從祀文正以罪謫死子守謙封靖江王自有傳正德

中御史徐文華言族無後者祭終兄弟之孫太廟配享諸王至今七世禮宜祧禮臣議仍之嘉靖中建九廟東西廡祔如故九廟災復同堂異室之制祔十五王於兩序盱眙臨淮王二妃配食南昌王妃王氏文正母也後薨祔葬皇陵不配食懿文太子標太祖第一子也母高皇后元至正十五年生於太平陳迪家太祖爲吳王立爲王世子從宋濂受經吳元年年十三矣命省臨濠墓諭曰商高宗舊勞於外周成王早聞無逸之訓皆知小民疾苦故在位勤儉爲守成令主兒生長富貴習於晏安今出旁近郡縣遊覽山川經歷田野其因道途險易以知鞍馬勤勞觀閭閻生業以知衣食艱難察民情好惡以知風俗美惡卽祖宗所居訪求父老問吾起兵渡江

時事識之於心以知吾創業不易又命中書省擇官輔行凡所過郡邑城隍山川之神皆祭以少牢過太平訪迪家賜白金五十兩至泗濠告祭諸祖墓是冬從太祖觀郊壇令左右導之農家徧觀服食器具又指道旁荆楚曰古用此爲朴刑以其能去風雖傷不殺人古人用心仁厚如此兒念之洪武元年正月立爲皇太子帶刀舍人周宗上書乞教太子帝嘉納中書省都督府請倣元制以太子爲中書令帝以元制不足法令詹同考歷代東宮官制選勲德老成及新進賢者兼領東宮官於是左丞相李善長兼太子少師右丞相徐達兼太子少傅中書平章錄軍國重事常遇春兼太子少保右都督馮宗異兼右詹事

中書平章政事胡廷瑞廖永忠李伯昇兼同知詹事院事中書左右丞趙庸王溥兼副詹事中書參政楊憲兼詹事丞傅瓛兼詹事同知大都督康茂才張興祖兼左右率府使大都督府副使顧時孫興祖同知左右率府事僉大都督府事吳楨耿炳文兼左右率府副使御史大夫鄧愈湯和兼諭德御史中丞劉基章溢兼贊善大夫治書侍御史文原吉范顯祖兼太子賓客諭之曰朕於東宮不別設府僚而以卿等兼領者蓋軍旅未息朕若有事於外必太子監國若設府僚卿等在內事當啟聞太子或聽斷不明與卿等意見不合卿等必謂府僚導之嫌隙易生又所以特置賓客諭德等官者欲輔成太子德性且選名儒爲之職此故也昔周公教成王克詰戎兵召公教康王張皇六師此居安慮

危不忘武備蓋繼世之君長富貴昵於安逸不諳軍旅一有緩急罔知所措二公之言其并識之是年命選國子生國琦王璞張傑等十餘人侍太子讀書禁中琦等入對謹身殿儀狀明秀應對詳雅帝喜因謂殿中侍御史郭淵友等曰諸生於文藝習矣然與太子處當端其心術不流浮靡庶儲德亦獲裨助因厚賜之未幾以梁貞王儀爲太子賓客秦鏞盧德明張昌爲太子諭德先是建大本堂取古今圖籍充其中徵四方名儒教太子諸王分番夜直選才俊之士充伴讀帝時時賜宴賦詩商榷古今評論文字無虛日命諸儒作鍾山龍蟠賦置酒歡甚自作時雪賦賜東宮官令三師賓客諭德朝賀東宮東宮答拜又命東宮及王府官編緝古人行事可

爲鑒戒者訓諭太子諸王四年春製大本堂玉圖記賜太子十年令自今政事並啟太子處分然後奏聞因諭曰自古創業之君歷涉勤勞達人情周物理故處事成當守成之君生長富貴若非平昔練達少有不謬者故吾特命爾日臨羣臣聽斷諸司啟事以練習國政惟仁不失於疎暴惟明不惑於邪佞惟勤不溺於安逸惟斷不牽於文法凡此皆心爲權度吾自有天下以來未嘗暇逸於諸事務惟恐毫髮失當以負上天付託之意戴星而朝夜分而寢爾所親見爾能體而行之天下之福也時令儒臣爲太子講大學衍義二十二年置詹事院以兵部尙書唐鐸兼詹事二十四年八月敕太子巡撫陝西帝意欲都陝西先遣太子相宅旣行使諭曰爾昨渡

江震雷忽起於東南導爾前行是威震之兆也然一旬久陰不雨占有陰謀宜慎舉動嚴宿衛施仁布惠以回天意仍申諭從行諸臣以宿頓聞比還獻陝西地圖遂病病中上言經畧建都事明年四月丙子薨帝慟哭禮官議期喪請以日易及當除服帝不忍禮官請之始釋服視朝八月庚申耐葬孝陵東諡曰懿文太子爲人友愛秦周諸王數有過輒調護之得返國有告晉王異謀者太子爲涕泣請帝乃感悟帝初撫兄子文正姊子李文忠及沐英等爲子高后視如已出帝或以事督過之太子輒告高后爲慰解其仁慈天性然也建文元年追尊爲孝康皇帝廟號興宗燕王卽帝位復稱懿文皇太子太子元妃常氏開平王遇春女繼妃呂氏子五人長雄

英早卒進封虞王諡曰懷次建文帝次允熲允燧允熙建文元年封允熲吳王允燧衡王允熙徐王俱未之藩成祖降吳王爲廣澤王居漳州衡王爲懷恩王居建昌徐王爲敷惠王隨母呂太后居太子陵未幾召允熲允燧還京廢爲庶人錮鳳陽先後卒改允熙爲甌寧王奉太子祀未幾邸中火暴卒諡曰哀簡

秦愍王棧太祖第二子母高皇后洪武三年封十一年就藩西安以耿炳文作宮用綠瓦怒欲殺炳文帝召還戒諭已復買童僕越中帝誅其長史二十二年改太宗正院爲宗人府以棧爲宗人令二十四年召棧入京師令皇太子巡視關陝明年皇太子還棧歸藩帝春秋高念邊甚令諸王備塞上棧

任關西軍務得專刑賞大將皆受節制御軍整肅二十七年
率平羌將軍甯正征西番於洮州擒斬過當西番懼而降帝
悅賚予甚厚明年薨賜諡册曰哀痛者父子之情追諡者天
下之公朕封建諸子以爾年長首封於秦期永綏祿位以藩
屏帝室夫何不良於德竟殞厥身其諡曰愍棧妃元河南王
王保保女弟次妃寧河王鄧愈女棧薨王妃殉子隱王尚炳
嗣沔人高福興等爲亂尚炳巡邊捕盜卒誅福興成祖卽位
使者至西安尚炳不出迎稱疾又不見使者成祖逮治王府
官吏賜尚炳書曰齊王拜胙遂以國霸晉侯倚玉見譏無後
王勉之其後來朝禮恭帝悅賜從官以下有差永樂十年薨
子僖王志塈嗣二十二年薨無子庶兄懷王志均嗣請長興

侯耿炳文故宅處諸弟宣德元年薨妃張氏未婚入宮守服
弟康王志塈嗣好古嗜學四年護衛軍張嵩等訐其府中事
志塈奏辭三護衛宣宗獎王無過還予一衛志塈顧數聽細
人正統十年誣奏鎮守都御史陳鎰按問皆虛而審理正秦
弘等又交章奏王凌辱府僚箠死軍役帝再以書戒飭之景
泰六年薨子惠王公錫嗣以賢聞成化二十二年薨子簡王
誠泳嗣能修惠王之業都御史雍泰罷居韋曲誠泳出入溫
泉時時過秦秦川多賜地軍民佃以爲業供租稅歲歉輒蠲
之長安有魯齋書院久廢弘治中提學楊一清欲復之故址
已半爲民居誠泳別易地建正學書院又於旁建小學擇軍
校子弟秀慧者延儒生教之親臨課試王府護衛得入學自

誠泳始所著有經進小鳴集弘治十一年薨無子從弟臨潼王誠潔子昭王秉機嗣十四年薨子定王惟焯嗣孝謹著聞世宗敕有司表以綽楔獻金助太廟工益歲祿二百石賜玉帶襲衣惟焯嘗奏請潼關以西鳳翔以東河壩地曰皇祖所賜先臣棧也戶部尙書梁材執奏陝西外供三鐘內給四王民困已極視國初土產物力萬不相侔豈得空地更給詔如材言嘉靖二十三年薨無子再從子宣王懷堦由中尉嗣追贈曾祖誠潤恭王祖秉柎順王父惟熾端王世宗朝奏以本祿千石贍諸宗賜敕獎諭四十五年薨子靖王敬鎔嗣萬曆四年薨子敬王誼澍嗣十四年薨弟誼漉由紫陽王嗣

薨子存樞嗣李自成破西安存樞爲賊所脅僞授權將

軍妃劉氏死之

汧陽王誠冽秦康王諸孫事父端懿王暨繼母以孝聞父疾經月不解帶及薨醢醬鹽酪不入口將葬暴雨顛天而霽葬已雨復大作明年墓生嘉禾一本雙穗嘉瓜二實並蒂慈烏異鳥環集以母馬妃早卒不逮養追服衰食蔬者三年雪中萱草生華咸謂孝感所致弘治十五年賜敕嘉獎時有輔國將軍秉樺亦好學篤行父病禱神乞以身代疾竟愈母喪廬墓有雙鶴翔集庭中定王以聞世宗表其門

晉恭王桐太祖第三子母高皇后也學文於宋濂學書於杜環洪武三年封十一年就藩太原中道答膳夫帝馳諭曰吾率羣英平禍亂不爲姑息獨膳夫徐興祖事吾二十三年未

嘗折辱怨不在大小子識之桐修日美髯顧盼有威多智數
嘗裂人以奔馬或告桐藏兵五臺山中反形已具帝大怒欲
發兵討之皇太子諫曰萬一兵往而桐拒命是父子爲敵也
如天下後世何臣請巡邊與俱來帝從之太子巡歷燕代及
晉與桐昆弟飲甚驩浟旬太子行桐送至河南太子告之故
令入朝桐惶恐從命至京帝怒未解太子哀祈甚切乃廢爲
庶人居京師與太子友愛彌篤日夜號泣悔罪帝憐之復其
爵敕歸藩更以恭愼聞待長史桂彥良汪河皆有禮二十六
年命總宋國公馮勝兵與燕王同出塞燕王深入北庭桐不
及第築城於下水帝切責之洪武三十一年薨子定王濟熿
嗣成祖初以濟熿縱下黜其長史龍潭濟熿懼欲上護衛不

許弟平陽王濟熿幼很戾失愛於父及長太祖召秦晉燕周
四世子及庶子之長者教於京師濟熿與燕王子高煦周王
子有爰邪譎相比不爲太祖所愛濟熿既嗣王成祖封濟熿
平陽濟熿追憾父并憾濟熿不爲解嗾其弟慶成王濟炫等
目訴濟熿過於朝又誘府中官校交支致其罪歷八年不已
帝乃奪濟熿爵與世子美圭皆爲庶人俾守恭王園而立濟
熿爲晉王濟熿既立驕恣暴橫一府被其害莫敢言至進毒
弑嫡母謝氏逼蒸恭王侍兒吉祥幽濟熿父子蔬食不給父
兄故侍從官人多爲所斃恭王宮中老嫗走訴成祖乃卽獄
中召晉府故承奉左微問之盡得濟熿構濟熿狀立釋微命
馳召濟熿父子濟熿幽空室已十年左微者故因濟熿牽連

繫獄或傳微死久矣及至一府大驚微入空室釋濟熿父子
相抱持大慟濟熿父子謁成祖行在所成祖見濟熿病惻然
封美圭平陽王使奉父居平陽予以恭王故連伯灘田會成
祖崩濟熿不爲服使寺人代縗臨幕中而不與美圭田仁宗
連以書諭濟熿卒不聽又聞朝廷賜濟熿王者冠服及他賚
予益怨望廣致妖巫詛咒不輟宣宗卽位濟熿密遣人結高
煦謀不軌寧化王濟煥告變比禽高煦又得濟熿交通書帝
未之問也而濟熿所遣使高煦人懼罪及走京師首實內使
劉信等數十人竝告濟熿擅取屯糧十萬餘石欲應高煦并
發其宮中詛呪事濟煥亦至是始知嫡母被弑馳奏遣人察
實敕召至京示以諸所發奸逆狀免爲庶人幽鳳陽同謀妖

巫官屬悉論死時宣德二年也乃復封濟熿爲晉王宣德十
年薨子憲王美圭嗣正統六年薨子莊王鍾鉉嗣弘治十五
年薨世子奇源及其子表榮皆前死表榮子端王知烺嗣追
封奇源爲靖王表榮爲懷王知烺七歲而孤能盡哀居母喪
嘔血芝生寢宮嘉靖十二年薨無子再從子簡王新塏嗣靖
王庶子新化王表棟榮澤王表榘皆懷王弟端王諸父也表
棟前死諡恭裕子知燁嗣爲新化王亦前死諡端和二子新
塏新塏端王請新塏嗣新化王未封而端王薨表榘謀攝府
事端王妃王氏曰王無後次及新化王新化王父子卒有孫
新塏在卽召入府拜几筵爲喪主表榘忿曰我尊行顧不得
王上疏言新塏端和王長子不得爲人後新塏宜嗣新化王

新墻宜嗣晉王禮部議新墻宜嗣追封祖表榦為安王父知
燭為康王新墻母太妃尚氏嚴教子以禮太妃疾新墻叩頭
露禱嘗以時勞苦府中吏士長史有數陳輒拜受教其老也
以弟新墻子慎鏡攝藩事萬曆三年薨慎鏡亦薨弟惠王慎
鋤嗣追封慎鏡敬王七年薨子穆王敏淳嗣請於朝封新墻
為和王三十八年薨子求桂嗣李自成陷山西脅求桂入北
京不知所終

慶成王濟炫晉恭王子也始生太祖方御慶成宴故他王率
繫以地而王獨號慶成成祖時坐擅發驛馬縱軍人為盜召
還薨諡莊惠子美靖嗣亦嘗以奸盜事為人所告薨諡恭僖
子鍾鎰嗣長子奇瀆嘗代父理府事筮死無辜七人奪冠帶

久之更以孝聞鍾鎰薨諡溫穆奇瀆嗣正德中以賢孝聞賜
敕褒獎薨諡端順子表樂嗣端順王生子七十人嘉靖初尚
書王瓊以聞於朝表樂樸茂寡言孝友好文學嘉靖三十年
壽八十詔書嘉獎資以金幣輔國將軍奇添端順王弟也早
卒夫人王氏守節奉姑六十餘年世宗時以節孝旌又溫穆
王曾孫中尉知燠病篤淑人賀氏欲先死以殉取瀕一勺咽
之左右方救奪賀曰瀕毒入臟腑無可救理即可救我必死
遂絕食飲竟與知燠同時卒表樂為奏聞禮官按典無旌命
婦例世宗特命旌之諡曰貞烈

西河王奇溯晉定王曾孫三歲而孤問父所在即慟哭長刻
梅檀為父順簡王像祀之母葉嘗病渴中夜稽顙禱天俄有

甘泉自地湧出葉飲泉病良已及卒哀毀骨立宮墀栢忽生
花異香襲人子表相嗣王亦以仁孝聞與寧河王表楠河東
嗣王竒淮並爲人所稱

新堞晉恭王七世孫也家汾州崇禎十四年由宗貢生爲中
部知縣有事他邑土寇乘間陷其城坐免官已而復任署事
者聞賊入關亟欲解印去新堞毅然曰受國恩無以報此吾
致命之秋也卽受之未幾賊傳檄至新堞方巡城怒而碎之
議拒守邑新遭寇人情瓦解乃屬父老令速去而已誓必死
妻盧氏妾薛氏馮氏請先自盡許之有女方數歲新堞拊其
背而勉之縊左右皆泣下乃書表封印使人馳送京師冠帶
望闕拜又望拜其母卽自經士民葬之社壇側以妻女附先

是土寇薄城縣丞光先與戰不勝遂自焚新堞歸哭之慟曰
殺身成仁雖死猶生至是亦死難

周定王櫛太祖第五子母高皇后也幼育於孫貴妃洪武三
年封吳王七年有司請置護衛於杭州帝曰錢塘財賦地不
可封罷護衛勿置改封周王十四年就藩開封卽宋故宮地
爲府二十二年櫛棄其國來鳳陽帝怒徙之雲南命豫王桂
居其邸尋止勿徙使居京師世子有燉理藩事召豫王還二
十五年敕歸藩建文初以櫛燕王母弟頗疑憚之櫛亦時有
他謀長史王翰數諫不納佯狂去櫛次子有燉告變帝陰使
李景隆脩邊道出汴猝圍王宮執櫛竄蒙化諸子並別徙已
復召還京錮之成祖入南京復其舊封加祿五千石永樂二

年獻頌九章及佾舞其年獻騶虞帝悅宴賜甚厚以汴梁有河患將改封洛陽櫛言汴堤固無重勞民力乃止十四年疏辭所賜在城稅課十九年有告櫛反者使都御史王彰諭意櫛懼獻還三護衛仁宗卽位加歲祿至二萬石櫛好學能詞賦太祖賜以元故宮姬得聞元宮中事作詞百章以國土夷曠庶草蕃廡考核其可佐饑饉者四百餘種繪圖疏之名救荒本草闕東書堂以教世子長史劉淳爲之師洪熙元年薨子憲王有燉嗣博學善書爲世子時刻東書堂帖製樂府新聲大梁人歌之弟汝南王有燉數訐有燉宣宗爲書諭之有勳與弟新安王有熿乃詐爲祥符王有燿與趙王書辭甚諄置彰德城外都指揮王友得書以聞宣宗逮友訊無迹召有

燿至曰必有勳爲此書訊之具服有勳少與高煦善建文中嘗誣定王反靖難後定王請誅之成祖不忍徙之大理定王老始歸有熿喜生食人肝腦薄暮伺人於門掠而殺之其邸前日未晡行迹爲斷至是並免爲庶人正統四年有燉薨無子妃鞏氏及夫人施氏歐氏陳氏張氏韓氏李氏皆殉死英宗諡妃貞烈六夫人貞順厚葬之弟簡王有燿嗣景泰三年薨子靖王子屋嗣七年薨弟懿王子墜嗣成化二十一年薨子惠王同鏢嗣弘治十一年薨世子安潢未襲封而卒孫恭王睦櫛嗣追封安潢爲悼王初安潢爲世子與弟平樂王安泛義寧王安浹爭漁利競置囹圄集亡賴爲私人惠王戒安潢不從王怒安泛因而傾之安潢亦持安泛不法事惠王薨

羣小交構安瀆奏安泛私壞宗廟社稷儀仗染作諸壇庫奸
 庶母安泛亦誣奏世子服中作戲丞惠王妾下鎮巡官案驗
 頃之安瀆死陸櫛立而幼安泛侵陵世子妃安湫亦許妃出
 不正其子不可嗣孝宗命太監魏忠刑部侍郎何鑑往按之
 安泛懼益誣世子毒殺惠王并言世子妃淫亂所連逮千人
 鑑等奏其妄削安泛為庶人幽鳳陽安湫亦革爵嘉靖十七
 年陸櫛薨子勤熄先卒孫莊王朝綱嗣追封勤熄為康王三
 十年薨子敬王在鉅嗣萬曆十一年薨子端王肅溱嗣
 薨子恭枵嗣崇禎十四年李自成攻開封恭枵出庫金五
 十萬餉守陴者懸賞格壹一賊者予五十金賊穴城將入守
 者投之以火賊被燄死者高與城平七晝夜始解去帝下詔

褒獎且加勞曰此高皇帝神靈憫宗室子孫維城莫固啟王
 心而降之福也其冬自成再圍汴築長圍城中樵採路絕十
 五年九月河決城潰恭枵從後山登西城樓率宮妃等及寧
 鄉安鄉永壽仁和諸王露棲雨中數日始獲免士民溺死者
 數百萬諸宗皆沒先是端王末發祕記有王室將衰河決為
 害語王告世子以為大感及是果驗

鎮平王有爨周定王第八子嗜學工詩兼通書畫騎射蹴鞠
 諸伎靡所不習一日讀中庸默有悟解作道統論數萬言又
 采歷代公族賢者自夏五子迄元直金百餘人作賢王傳若
 千卷有德善齋詩集
 博平王安波惠王第十三子惠王子二十五人而安波獨以

文雅得譽嘗輯貽後錄養正錄等書勤於治生田園僮奴車馬甚具以故賓客日造門安滅傾已延納之其時稱名德者必曰博平

南陵王睦模悼王第九子敏達有識嘉靖末御史林潤言天下財賦歲供京師米四百萬石而各藩祿歲至八百五十三萬石山西河南存留米二百三十六萬三千石而宗室祿米五百四萬石卽無災傷蠲免歲輸亦不足供祿米之半年復一年愈加蕃衍勢窮弊極將何以支事下諸王議明年睦模條上七議請立宗學以崇德教設科選以勵人才嚴保勘以杜冒濫革冗職以除素餐戒奔競以息饕貪制拜掃以廣孝思立憂制以省祿費詔下廷臣參酌之其後諸藩遂稍稍陳

說利弊尙書李春芳集而上焉及頒宗藩條例多采睦模議鎮國中尉睦樺字灌甫鎮平王諸孫父奉國將軍安河以孝行聞於朝璽書旌賚旣沒周王及宗室數百人請建祠詔賜祠額曰崇孝睦樺妊十四月而生幼端穎朗詣郡人李夢陽奇之及長被服儒素覃精經學從河洛間宿儒游年二十通五經尤邃於易春秋謂本朝經學一稟宋儒古人經解殘闕放失乃訪求諸海內通儒繕寫藏弃若李鼎祚易解張洽春秋傳皆敘而傳之家故僮奴數百人逐十一利資益大起訪購圖籍傾身游賢豪間通懷好士而內行修潔事親晨昏不離側喪三年居外舍有第五人親爲教督盡推遺產與之築室東坡之上延招學徒與其研席名聲籍甚呂柟與論易

嘆服而去萬曆五年舉文行卓異爲周藩宗正邸中大製作皆出其手修河南通志撰中州人物志中州之文獻徵焉領宗學約宗生以三六九日午前講易詩書午後講春秋禮記雖盛寒暑不輟命諸生刺舉同異撰五經稽疑六卷授經圖傳四卷觀陶九成前元十九帝統系作大明帝世表周國世系表感建文紀錄失寔作遜國褒忠錄合沈約吳棫韻舉正謬誤作韻譜五卷又作河南通志開封郡志其詩文有坡上集二十卷近代藏書之富推江都葛氏章丘李氏睦樺傾資購之起萬卷堂諷誦其中竭四十年之力丹鉛歷然論者以漢劉向方之巡撫褚鈇有恤宗通變疏議稍減郡王以下歲祿均給貧宗帝遣給事中萬象春就周王議新會王睦樺號

於衆曰裁祿之謀起於睦樺聚宗室千餘人擊之裂其衣冠上書抗詔帝怒廢睦樺爲庶人睦樺屢疏引疾乞休詔勉留之又三年卒年七十宗人頌功德者五百人詔賜輔國將軍禮葬之異數也學者稱爲西亭先生時有將軍安汎者一歲喪母事其父以孝聞父病革刲臂爲湯飲父父良已年七十追念母不逮養服衰廬墓三年詔旌其門素精名理延納詞人聲譽大著人稱睦樺爲大山安汎爲小山云

勤熨鎮國中尉也倜儻好大畧周王嫉之言其過於朝世宗奪其歲祿勤熨旣失職乃上書曰陛下躬上聖之資不法古帝王兢業萬幾擇政任人乃溺意長生屢修齋醮興作頻仍數年來朝儀久曠委任非人遂至賄賂公行刑罰倒置奔競

成風公私殫竭脫有意外變臣不知所終邇者天心仁愛災異叠徵不下罪已之詔諸大臣亦無避路之章慶瑞頌符接口連牘恐非所以承天變伏惟皇上念祖宗創業之艱敬昊天顯道之戒復視朝之禮罷土木之工開忠諫之路屏邪枉之人則天意可回人心用勸將與唐虞等齡齊名臣言出禍隨得從劉向李勉趙汝愚同遊地下無恨帝覽疏怒坐誹謗降庶人幽鳳陽子朝增已賜名以罪人子無敢為請封者上書請釋父罪且陳中興四事詔并禁錮穆宗登極釋歸令有司存恤又有海陽王子朝唯上言十事其一事請釋睦柤時宗人越關之禁甚嚴諸詣闕上書者皆得罪帝視朝唯疏文舛字譌似狂疾者特免之

楚昭王楨太祖第六子母昭敬胡克妃始生時平武昌報適至帝喜曰子長以楚封之洪武五年分封楨當王齊鑄寶不能就帝曰朕昔固心許封楚也遂封楚十四年就藩武昌帝賜楨經史楨錄御製洪範及大寶箴置座右是年率江夏侯周德興討散毛諸洞蠻明年討大庸諸洞皆平之十八年銅鼓五開諸蠻亂出沒不常楨與信國公湯和分屯諸洞立柵與蠻人襍耕作久之擒其渠魁餘黨悉潰二十年討雲南阿魯速追至鄜州擒之二十四年征西番二十七年討道州全州叛徭明年討桂陽山寇又明年討瀘溪黔陽諸洞蠻楨自沅州伐山踰阻至天柱寨平之三十年古州蠻叛帝使楨與湘王柏率師十萬往征楨請餉三十萬又不親蒞軍帝詰責

之是年熒惑入太微帝以太微楚分諭楨戒慎楨書十事以自警未幾楨子巴陵王卒帝復與敕曰舊歲熒惑入太微太微天庭居翼軫楚分也五星無故入災必甚焉爾子疾逝恐災不止此尚省慎以回天意至冬王妃薨時初設宗人府以楨署右宗人事成祖卽位召爲宗正永樂二十二年薨子莊王孟烷嗣宣德中平江伯陳瑄密奏湖廣東南大藩襟帶湖湘控引蠻越人民蕃庶商賈輻聚楚設三護衛自始封至今生齒日繁兵強國富護衛之官交姻連婭小人行險或生邪心陛下選其精銳以轉漕爲名俟至京師因而留之可無後患帝曰楚無過不可孟烷聞之懼請納兩護衛自留其一帝勞而聽之正統四年薨子憲王季垵嗣事母鄧妃至孝英宗

賜書獎諭著東平河間圖贊爲士林所誦正統八年薨弟康王季淑嗣天順六年薨再從子靖王均鉞嗣均鉞莊王子東安王季堞子也正德五年薨子端王榮滅嗣以仁孝著稱武宗表曰彰孝之坊嘉靖十三年薨子愍王顯榕嗣居端王喪遇慶禮却羣臣賀靖王壻儀賓沈寶怨顯榕使弟貢誣奏顯榕幸臣甘玉海率衆呼顯榕萬歲且誘顯榕設水戲以習水軍世宗下其章撫臣具言顯榕居喪却賀能守禮寶坐誣削爲民顯榕妃吳氏生世子英耀他姬生英燦英耀悅王宮人方三兒用所狎陶元兒等計誘至外舍烝焉顯榕知之禁方三兒北院笞殺元兒英耀懼且怨居無何英耀又悅妓宋么兒與卒劉金計匿么兒入所居緝熙堂顯榕欲罪金金遂誘

英燿與其黨徐景榮等謀爲逆嘉靖二十四年正月十八日張燈置酒饗顯榕別宴顯榕弟武岡王顯槐於夾室酒半金與黨田堯等從座後杲息間擁出以銅瓜擊顯榕腦立斃顯槐驚救亦被擊傷左脇從者彭漢挾以奔得免顯榕左右朱恩等奪門出絕城報撫按英燿徙顯榕屍宮中命長史孫立等以中風報仍逼崇陽王顯休等保奏會撫按先以實聞世宗逮英燿等入京告太廟斬英燿焚屍揚灰景榮金堯等二十六人凌遲立等棄市顯休等革祿十之三顯槐以救顯榕及通山王英炊直奏英燿弒逆事皆賚金幣而英燿弟恭王英燦嗣隆慶五年薨子華奎幼武岡王顯槐東安王顯梈迭攝府事以互訐先後削祿萬曆八年華奎始嗣爵衛弁王守

仁訐稱遠祖定遠侯弼楚王楨妃父也遺璫寶數百萬寄楚帑爲嗣王侵匿帝心動遣中官清核華奎奏辨且請避宮搜掘皆不報久之繫鞫王府承奉等無所得時諸璫方以搜括希上意不欲暴守仁罪帝頗悟撤回中官言者論守仁僞造皇祖制書誣逼親藩罪當死亦不報華奎乃奏上二萬金助三殿工旣而宗人華越等言華奎與弟宣化王華璧皆非恭王子華奎恭王妃兄王如言子抱養宮中華璧則王如綉家人王玉子也華越妻卽如言女知之悉禮部侍郎郭正域請行勘大學士沈一貫納華奎賂止之不得乃委撫按訊皆受一貫指言僞王他無左驗而越妻王氏持其說甚堅不能決廷議令覆勘中旨以楚王襲封已二十餘年宜治華越等誣

罔御史錢夢臯爲一貫劾正域正域發華奎行賄事華奎遂
訟言正域主使正域竟罷去東安王英燧武岡王華增江夏
王華壇等皆言僞跡昭著行賄有據諸宗人蘊鏞等赴都投
揭奉旨切責罰祿削爵有差禮部侍郎李廷機坐華越以謀
害親王律死法司溫純等持之降庶人錮鳳陽未幾華奎輸
賄入都宗人遮使者奪之巡撫趙可懷屬有司捕治宗人方
恨可懷治華越獄不平遂大閱毆可懷死巡按吳楷以楚叛
入告一貫大其事擬發兵會勦命未下諸宗人悉就縛於是
斬二人勒四人自盡錮高牆及禁閒宅者復四十五人自是
無敢言楚事者初閣臣沈鯉直正域而朱賡比一貫久之
貫鯉去賡瀕卒留疏自白廷臣皆訟楚獄冤帝乃以恩詔釋

諸禁錮者迄不竟華奎事禮臣以前湖廣布政薛三才言華
奎酷似王如言請確勘不省其後張獻忠掠湖廣華奎募卒
自衛以張其在爲帥獻忠兵至武昌其在爲內應執華奎以
篋輿沈之東湖諸宗無免者

武岡王顯槐端王第三子愍王弟也嘉靖四十三年上書條
藩政請設宗學擇立宗正宗表督課親郡王以下子弟十歲
入學月餼米一石三載督學使者考績陟其中程式者全祿
之五試不中課則黜之給以本祿三之二其庶人暨妻女月
餼六石庶女勿加恩其後廷臣集議多采其意云而顯槐以
攝藩事爲撫臣所奏削祿失令譽

齊王樽太祖第七子母達定妃洪武三年封十五年就藩青

州二十三年命王率護衛及山東徐邳諸軍從燕王北征二十四年復率護衛騎士出開平時已令總兵官傅友德調發山東都司各衛軍馬出塞諭王遇敵當自爲隊奏凱之時勿與諸將爭功博累歷塞上以武畧自喜建文初有告變者召至京廢爲庶人與周王同繫燕兵入金川門急遣兵護二王二王卒不知所以大怖伏地哭已知之乃大喜成祖令王齊如故封其子賢烜爲樂安王賢焮爲長山王賢焮爲平原王博驕縱帝與書召來朝面諭王無忘患難時博益自疑陰畜刺客招異人術士爲呪詛輒用護衛兵守青州城並城築苑牆截往來守吏不得登城夜巡李拱曾名深等上急變博拘匿以滅口永樂三年詔索拱諭博改過是時周王橚亦中浮

言上書謝罪帝封其書示博明年來朝廷臣劾博罪博厲聲曰奸臣喋喋又欲效建文時耶會盡斫此輩帝聞之不懌留博京邸削其護衛誅指揮柴直等盡出博繫囚及所造不法器械羣臣請罪教授葉垣等帝曰王性克悖朕溫詔開諭至六七猶不悛教授輩如王何垣等先自歸發其事可勿問博留京益有怨言乃召其子至京父子並奪爵宣德三年福建妄男子樓濂詭稱七府小齊王謀不軌事覺械至京誅其黨數百人博及三子皆暴卒幼子賢懌安置廬州景泰五年徙齊庶人谷庶人置南京敕守臣慎防之後谷庶人絕齊庶人請得谷庶人第嘉靖十三年釋高牆庶人長鑿博曾孫也萬曆中有承綵者亦博裔齊庶人多克狡獨承綵好學三十二

年中秋日大集四方名士百二十人於金陵分題賦詩承綵名由此大著

潭王梓太祖第八子母達定妃洪武三年封十八年就藩長沙梓英敏好學善屬文嘗召府中儒臣設醴賦詩親品其高下賚以金幣妃于氏都督顯女也顯子琥初爲寧夏指揮胡惟庸遣封績致書哈刺章琥寔傳致之二十三年事露顯與琥俱坐誅梓不自安帝遣使慰諭且召入見梓大懼卽與妃自焚死無子除其封

趙王杞太祖第九子洪武二年生次年受封明年殤

魯荒王檀太祖第十子母郭寧妃洪武三年生兩月而封十八年就藩兗州好文禮士善詩歌餌金石藥毒發傷目帝

嫉之二十二年薨故諡曰荒王子靖王肇輝嗣肇輝甫兩月母湯妃信國公和女撫育教誨有度永樂元年嗣王成祖愛重之車駕北巡過兗錫以詩幣宣德初上言國長史鄭昭紀善王貞奉職三十年矣宜以禮致其事帝謂蹇義曰皇祖稱王禮賢敬士不虛也成化二年薨子惠王泰堪嗣九年薨子莊王陽鑄嗣嘉靖二年薨歸善王當沅莊王幼子也正德中流賊攻兗當沅率家衆乘城取護衛弓弩射却賊降敕獎諭遂以健武聞數與卒袁質舍人趙巖校射質家東平武斷爲鄉人所惡吏部主事梁穀亦東平人少不檢倚惡少爲助既貴頗厭苦之又與千戶高乾有怨正德九年穀邑子西鳳竹屈昂誑穀云質巖且爲亂穀心動因并指乾等告變於尙書

楊一清兵部議以大兵駐濟南伺變會陽鑄入長史馬魁譖言當沅欲反虞禍及奏於朝毅復言當沅與質等連謀帝遣司禮太監溫祥大理少卿王純錦衣衛指揮韓端往執當沅益發兵布置諸要地京師洶洶羣臣爭上方畧祥等至充圍當沅第當沅方醉臥驚曰何爲者索其兵械則故所射賊弓弩半渝徹矣祥等讞毅所指皆平人於是御史李翰臣劾毅報怨邀功長史魁惑王罔奏宜卽訊詔下翰臣獄謫廣德州判官免毅罪不問御史程啟充等疏言毅魁鼓煽流言啟小人喜功之心致大臣輕信之失死不蔽法縱首禍而謫言者非國體不報廷臣議當沅罪卒無所坐以藏護衛兵器違祖制廢爲庶人戍質等於肅州所連逮多瘐死魁坐誣奏斬鳳

竹昂流口外中官送當沅之高牆當沅乃大慟曰冤乎觸牆死聞者傷之莊王在位久世子當從當從子健棧皆前卒健棧子端王觀焯嗣追封當從懷王健棧悼王觀焯狎典膳秦信等遊戲無度爲複屋曲房於東園挾娼樂裸男女襍坐左右有忤者錐斧立斃或加以炮烙信等乘其勢嗤殺人有抉眼截舌死者館陶王當恣兇暴淫縱與觀焯交惡糾諸宗室訐觀焯觀焯亦訐當恣世宗念觀焯尙幼革其祿三之二逮誅信等亦革當恣祿三之一嘉靖二十八年觀焯薨子恭王頤坦嗣有孝行捐邸中田湖以贍貧民辭常祿以贍貧宗世宗嘉之璽書凡七勞焉萬曆二十二年薨世子壽鏞先卒弟敬王壽鏞嗣二十八年薨弟憲王壽鏞嗣崇禎九年薨弟

肅王壽鏞嗣十二年薨子以派嗣城破自縊弟以海事別載
輔國將軍當濟鉅野僖順王泰澄諸孫也慷慨有志節嘉靖
三年上書請停郡縣主郡縣君卹典以蘇民困七年奏辭輔
國將軍祿并子奉國將軍健棹祿佐疏運河賜敕褒諭又上
書言各藩郡縣主郡縣君先儀賓沒者故事儀賓得支半祿
今四方災傷邊陲多事民窮財盡而各儀賓暴橫侈肆多不
法請勿論品級減其月給明年又請以父子應得祿米佐賑
因勸帝法祖宗重國本裁不急之費息土木之工詞甚剴切
帝嘉其意特敕褒之不聽辭祿時東甌王健楸無子上書言
宗室所以蕃由詐以媵子爲嫡糜費縣官今臣無嫡嗣請以
所受府第屯厰盡歸魯府待給新封省民財萬一乞著爲例

報可

奉國將軍健根鉅野恭定王陽瑩諸孫博通經術宦遊充中
者莫不延納年七十猶執鐵如意縱談名理亶亶不倦嘉靖
中詔褒其賢孝子鎮國中尉觀煙字中立居母喪蔬食逾年
哀毀骨立嘗繪太平圖上獻世宗嘉獎之賜承訓書院名額
并五經諸書所著濟美堂藁畫法權輿若干卷又輯齊魯詩
爲海岳靈秀集弟觀鞅亦以詩畫著名嘗請辭祿廬父墓未
允同時鉅野中尉頤塚字育甫安丘將軍頤墉字冕甫皆倜
儻有逸才聲詩清拔二甫之名滿天下頤墉著元同館集頤
塚著赤霞館集而樂陵王頤堧亦喜稱詩著東魯勝槩四卷
安丘王當遂魯靖王曾孫少孤事祖父母以孝聞母衛妃之

喪徒跣執紼上書乞棄爵廬墓孝宗溫諭止之曾孫頤堀嗣好學秉禮以方正稱尤諳練典故藩邸中有大疑輒就頤堀決焉頤堀雖博雅多聞一意韜晦不干聲譽監司守令希見其面年踰七十猶手不廢書人欽其名德比之東平云壽鉢魯府宗室也家兗州崇禎中爲雲南通判有聲績永明王以爲右僉都御史募兵雲南值沙定洲亂兵不能集孫可望兵至壽鉢知不免張麾蓋往見之行三揖禮曰謝將軍不殺不掠之恩可望脅之降不從繫於他所使人誘以官終不從從容題詩於壁或以詩報可望遂遇害

蜀獻王椿太祖第十一子母郭惠妃滁陽王女也洪武十一年封二十三年就藩成都王孝友慈祥出於天性博綜典籍容止都雅帝戲呼爲蜀秀才嘗奉命閱武中都卽闢西堂延李叔荆蘇伯衡商推文史旣至蜀聘方孝孺爲世子傅表其居曰正學以風蜀人臨講郡學知諸博士清貧分祿餼之月一石著爲令造安車以賜長史陳南賓聞義烏王紳賢聘至待以客禮紳父禕死雲南往求遺骸椿津給之時諸王皆備邊練士卒而椿獨以禮教守西陲番人入寇燒黑崖關椿請於朝遣都指揮瞿能隨藍玉出大渡河邀擊之自是蠻人讐伏前代兩川之亂皆因內地不逞者鈎致爲患有司私市蠻中物或需索啟爭椿請繒錦香扇之屬從王邸定爲常貢此外悉免宣索蜀人由此安業日益殷富東西川二百年不被兵革椿力也成祖卽位來朝賜予倍諸藩谷王穗椿母弟也

圖不軌椿子悅燿獲咎於椿走樵所樵稱爲故建文君以詭
衆永樂十四年椿暴其罪成祖報椿王此舉周公安王室之
心也入朝賚黃白金繒綵鉅萬永樂二十一年薨世子悅煉
先卒諡曰悼莊孫靖王友堉嗣初華陽王悅燿謀奪嫡椿覺
之會有他過杖之百將械於朝友堉爲力請得釋椿之薨友
堉方在京師悅燿竊王帑友堉不問悅燿更誣奏友堉成祖
召入訊之會帝崩仁宗察其誣命歸藩召悅燿悅燿猶執奏
仁宗抵其章於地遷之武岡其後復遷澧州宣德五年總兵
官陳懷言蜀邸以砲警夜非制乃罪其官屬削護衛三之一
宣德六年薨妃李侍姬黃皆自經以殉無子弟僖王友堉嗣
九年薨獻王第五子和王悅燿由保寧王嗣天順五年薨繼

妃徐年二十六不食死諡靜節子定王友孩嗣七年薨子懷
王申鉞嗣成化七年薨弟惠王申鑿嗣弘治六年薨子昭王
賓瀚嗣正德三年薨子成王讓嗣自椿以下四世七王幾
百五十年皆檢飭守禮法好學能文孝宗恒稱蜀多賢王舉
獻王家範爲諸宗法讓栩尤靜哲喜儒雅不遜聲伎創義學
修水利賑災卹荒嘉靖十五年巡撫吳山巡按金粲以聞賜
敕嘉獎署坊表曰忠孝賢良二十年建太廟獻黃金六十斤
白金六百斤酬以玉帶幣帛嘉靖二十六年薨子康王承燾
嗣三十七年薨子端王宣圻嗣萬曆四十年薨子恭王奉銓
嗣
薨子至澍嗣北京陷蜀尙無恙至澍寄帑蠻
中是冬成都破合宗殲焉至澍率妃妾輩投於井

湘獻王柏太祖第十二子母胡順妃豫章侯美女也洪武四年生十一年冊封十八年就藩荊州柏粹美嗜學讀書至夜分篝燈警枕精思入微開景元閣招納俊乂日事校讐志在經國論古兵制有宿將所不及者膂力過人握弓矢刀槊馳馬若飛二十八年受命討常德叛寇殲之虎渡三十年五月同楚王楨討古州蠻克之每出入縹囊載書以自隨遇山水勝境輒徘徊終日勒石紀事平居於儒書外尤善道家言自號紫虛子建文初疑忌親藩或有告柏反者帝遣使即訊柏懼無以自明闔宮焚死諡曰戾王無子封除永樂初改諡獻置祠官守其園

代簡王桂太祖第十三子母郭惠妃洪武十一年封豫王二

十五年改封代是年就藩大同糧餉艱遠令立衛屯田以省轉運桂與蜀王椿同母性暴不如蜀王賢建文時廢爲庶人成祖卽位復爵永樂元年詔曰聞王縱戮取財國人甚苦告者數矣且王獨不記建文時耶已復條桂三十二罪譙讓之召入朝不至再召乃至遂革其三護衛王妃中山王徐達女仁宗文皇后妹也驕而妒漆桂二侍女爲癩逐之事聞帝以中山王故不罪桂不悅妃移怒世子遜熯出其母子居外舍桂已老尙時時與子遜熯遜熯諸王窄衣秃帽遊行市中袖錘斧傷人王府教授楊普上言遜熯狎軍人武亮與博戲致箠殺軍人朝廷杖治亮下書責戒稍斂戢正統十一年桂薨世子遜熯先卒諡悼戾孫隱王仕壘嗣追封世子爲戾王仕

壘嘗言總兵郭登有功大同寇欲得大同爲巢穴非登不能
守朝廷爲勞登戾王弟遜焮廣靈王遜焮潞城王遜焮山陰
王遜焮襄垣王遜焮靈丘王遜焮宣寧王遜焮懷仁王遜焮
隰川王天順五年以代隘徙封懷仁於霍山陰襄垣於蒲靈
丘於絳宣寧隰川於澤仕壘惡其子定安博野二王請併徙
帝曰王不仁乃欲遠其子然竟徙定安於忻天順七年薨子
惠王成鍊嗣弘治二年薨子聰沫先封武邑王以肆酒毆樂
工革爵已居惠王喪益淫酗召妓歌舞內使諫輒拷掠之多
死者事發廢爲庶人遷太原久之惠王妃爲疏理復封武邑
王卒子懿王俊杖襲封代王乃追封聰沫爲思王嘉靖三年
大同軍叛圍王宮迫王具奏請赦俊杖東走宣府帝命鎮巡

官禮遇之賜書慰問宣府總兵官傅鐸奏言王寤道築封國
欲詣闕陳罪詔毋來事寧送回藩嘉靖六年薨子昭王充燿
嗣十一年大同軍又叛充燿復東走宣府帝再賜慰問十八
年樂昌王聰涓乞徙代州禮科都給事中丁湛言樂昌王以
城域狹隘物價騰貴請徙倘代王亦以是請何以應之天下
宗藩皆聚處一城亦皆以是請又何以應之况代藩北控邊
鄙南輔圻甸比他藩尤要重數年以來叛者繼起近甫少寧
正宜休息示以安靜乃今宗親無故改遷搖惑衆志不可已
而樂昌王竟徙朔州二十四年和川奉國將軍充灼坐罪奪
爵怨望乃與襄垣中尉充焮謀引寇入大同殺代王以舉事
應州人羅廷璽與其黨王廷榮以白蓮教惑衆入見充灼爲

妖言充灼因與畫計約奉小王子入居大同藉塞外兵攻鴈門取平陽立充灼為王事定即計殺小王子充灼然之先遣人陰持火箭焚大同草場五六所而令通塞外語者衛奉闌出邊總兵周尙文邏卒遮獲其所獻小王子表物鞫實以聞充灼等伏誅總督侍郎翁萬達疏言大同土產狹瘠祿餉不支代宗孕育日繁眾聚而貧且地近邊易生反側請量移和川昌化諸府於山陝隙地詔改遷於山西先是景泰間昌化王仕壇乞移封景帝不許至是乃遷代宗自簡至懿封郡王者凡二十有三而外徙者十王嘉靖二十六年充燿薨子恭王廷埼嗣三十年廷埼捐祿五千兩以濟軍費帝降勅褒之饒陽王充燿數以事侵廷埼恐得罪乃以陳邊事為名先暴

鍾巡官之惡世宗為逮繫巡撫何思總兵徐仁等充燿益驕遂與廷埼互訐前後勘官莫能判巡撫侯鉞奏奪其祿充燿怒不承帝遣司禮少監王臻即訊充燿乃伏下法司銅高墻萬曆元年廷埼薨子定王鼐鉉嗣三十二年鼐弟鼐鈞嗣嫡妃無子從姬裴生子鼎渭已請名矣裴死次妃張生子鼎莎有寵奏以為嗣禮官謂鼎莎母雖封不得稱嫡鼐鈞不奉詔內閣禮部屢上章言之不報後十餘年鼎莎死復請以其弟嗣神宗怒鑄鼎鈞祿鼎渭始得嗣鼐鈞薨子康王鼎渭襲封崇禎二年薨子彝嗣
 薨子傳濟嗣十七年三月李自成入大同闔門遇害
 襄垣王遜燂簡王第五子分封蒲州諸王就藩後非請命不

得歲時定省遜燁念大同不置作思親篇詞甚悲切代人傳頌之其後宗人聰灑聰浚俊懽俊杓俊噤充焯皆爛於文章俊噤字若訥尤博學有盛名不慕榮利築居五姓湖輕舟蠟屐與名士登臨吟嘯自號蘆花散人有佩蘭集行於世姊陵川縣君適裴禹卿地震城崩禹卿死焉縣君以首觸樁嘔血死年二十有一詔旌爲貞節縣君

靈丘王遜焄代簡王第六子也宣宗時封好學手不釋卷工詩有雲溪稿千餘首尤善醫頻年瘟疫焄劑藥遍給之全活者無算成化十一年薨諡曰榮順子仕塲嗣弘治六年薨諡曰僖靖子成鈺嗣弘治十年薨諡曰莊和子聰瀉嗣自仕塲至聰瀉三代皆以孝旌子俊格善屬文聚書數萬卷尤好古

篆籀墨蹟手摹六十餘種勒石名崇理帖世宗時獻皇儲明堂二頌興獻帝后挽歌賜金帛著天津集若干卷未幾卒聰瀉乞封其孫廷址爲會長孫禮官奏無故事帝以王壽考特許之已而復封廷址子彙鏞爲元長孫嘉靖三十四年聰瀉薨年八十三諡曰端懿彙鏞襲高祖爵聰瀉嘗奏叔父成鏞廬墓負土壘塚世宗賜金幣獎諭詔禮官自今宗室中有孝行卓異如成鏞者撫按疏聞

成鏞隰川王諸孫父仕塲坐罪幽鳳陽病死成鏞微服走鳳陽視喪上疏自劾越禁乞負父骨歸葬澤州卽不得願爲庶人止墓側歲時省視詔許之成鏞乃奉喪歸弟成鏞亦好學有志槩嘉靖十三年上言雲中叛卒之變幸獲銷弭究其釁

端寔貪酷官吏激成之臣慮天下之禍隱於民心異日不獨雲中而已指陳切直帝下廷臣飭行時以其兄弟爲二難焉萬曆二十年西夏弗寧山陰王俊柵奏詩八章寓規諷之旨代處塞上諸宗洵經禍亂其言皆憂深思遠有中朝士大夫所不及者


廷鄣代府宗室也崇禎中爲鞏昌府通判署秦州事有廉直聲十六年冬賊陷秦州擁見賊帥使之跪叱曰我天朝宗姓頭可斷膝不可屈賊欲活之大呼曰今日惟求一死坐白若乃見殺

肅莊王模太祖第十四子母郅無名號洪武十一年封漢王二十五年改封肅置護衛充以陝西各衛兵未集命王且駐平涼二十六年就藩甘州三十年令督軍屯糧遇征伐以長興侯耿炳文從建文元年乞內徙遂移蘭州模聽百戶劉成言罪平涼衛軍成祖怒救械成等送京師永樂十七年薨子康王瞻焰嗣宣德八年上二護衛府中被盜爲榜募告捕者御史言其非制罪長史楊威瞻焰又請加歲祿宣宗曰洪武永樂間歲祿不過五百石莊王不言者以朝廷念遠地難轉輸故也仁考卽位加五百石矣朕守祖制不敢違正統元年上言甘州舊邸改都司而先王墳園尚在乞禁伐近邸林木從之天順三年上馬五百匹備邊予直不受帝強予之天順八年薨子簡王祿埤嗣成化十五年薨子恭王貢鏊嗣嘉靖十五年薨恭王在位久世子直淤長孫弼桓皆早卒次孫定

王弼枕嗣追諡真於靖王嘉靖四十一年薨子縉焯先卒孫
懷王紳堵嗣追諡父縉焯為昭王四十三年薨靖王第四子
弼柿先卒子輔國將軍縉熿以次及禮官言縉熿懷王從父
不宜襲世宗詔以本職理府事奉莊王祀上冊寶罷諸官屬
穆宗即位定王妃吳氏及延長王真澆等上言聖祖刈羣雄
定天下報功之典有隆無替臣祖莊王受封邊境操練征戍
屏衛天家不幸太宗中絕反拘於昭穆之次不及勲武繼絕
之典非所以崇本支厚藩衛也反覆數千言帝下部議議以
郡王爵理藩政隆慶五年帝特命嗣肅王追諡父弼柿為安
王萬曆十六年薨諡曰懿王子憲王紳堯嗣四十六年薨子
識鋹嗣崇禎十六年冬李自成破蘭州被執宗人皆死

明史藁

列傳第三終



木下山人集列傳三

三

